

奉天通志

三函之二冊
大事清高宗二三

奉天通志卷三十三

大事三十三 清

清七 高宗二

高宗乾隆十一年春正月霍備免以蘇昌爲奉天府尹

清實錄正月戊子軍機大臣等奏遵旨查辦奉天流寓民人一案前奉恩旨令情願入籍之民取保入籍不願者定限十年陸續回籍迄今五年有餘該府尹霍備蒞任數載其各州縣流寓民人並未取保入籍亦未令其回籍漫無稽查而定議後出關人數續添四萬七千餘口聚集益衆是奉旨立限之案該府尹既不實心辦理又不將不辦緣由奏聞實屬怠玩請將霍備解任來京交部議處至將軍達勒當阿同任地方咎亦難辭但到

任未久且旗人所居之地尙無流寓民人應令該將軍回任後作速委員會同地方官實力查辦毋得仍事因循從之

又正月己丑諭軍機大臣等清理奉天民人一案府尹霍備寢攔不辦朕已照議交部議處奉天風俗向稱淳厚後因民人聚集日衆漸染澆漓臣工奏請定議勒限半年俱令回籍朕以關內關外皆係赤子伊等寄寓日久一旦驟令搬移未免失業是以定限十年令其陸續查辦其山海關給票查驗之處朕照臣工所議允行今府尹霍備不行辦理解任來京交與將軍達勒當阿會同新府尹查辦誠恐因朕處分霍備不能體會朕意將現在奉天之民俱勒令入籍抑或盡令回籍以致百姓不安於地方不無滋擾不知朕之所以處分霍備者其不編查奉天寄

寓民人之過尙輕爲其出關人數添至數萬漫無查察實屬怠玩爾等可將朕意傳諭將軍及新府尹善爲辦理至於山海關出關民人將來若能查察照會不致逐漸增多則奉天現在寄寓民人亦可漸次清理該將軍等自應遵照原議實力奉行並寄信與那蘇圖令轉飭地方官員留心查察不得仍前怠忽

又以工科給事中蘇昌爲奉天府府尹

按自是專用旗員專

耆獻類徵

十一百六十九

蘇昌傳十一年正月擢奉天府府尹

二月舉行乾隆十年分奉天大計

清實錄二月甲寅大計乾隆十年分奉天年老官一員有疾官

一員處分如例

三月申禁民人出山海關

清實錄三月甲午軍機大臣等議覆直隸總督那蘇圖奏稱嚴禁民人出山海關酌議四條一向例近關民人出口俱由臨榆縣給票遠方流民因關口盤詰有租賃貨物假冒商販賺票出關之弊不若從本籍給與印票路引者更有根據查各省貿易出關人等既經山海關地方官給票查驗原議已屬周詳該督所稱各弊乃是地方官稽查不周止應令遵照原議實力稽查若通行各省將貿易人等俱從本處給與印票路引事屬紛煩應毋庸議至所稱出關之人未盡如期回籍銷票者原議俟年底查明驅逐應令臨榆縣與守關官弁按季造冊二本一由永平府轉報存案一移知該民人所往之州縣俾其查對俟應行回籍之時即可遣逐進關應如所請按季造冊以便隨時稽查

一出邊道路除山海關外尚有喜峰口等十五處向來商販往來並無給票放行之例稽查未爲嚴密或有流寓之人夾雜偷越亦未可定應如所議喜峰口等十五處亦照山海關之例令守口官弁會同各該地方官逐項查詢給票放行仍與奉屬地方官按季關會其古北口龍井關青山口榆木嶺擦牙子等處一切外來商販執票赴奉者俱令從山海關出口不准由此經行一各省海船出洋亦有隨帶民人至奉天者自應一例稽查應如所議行令山東閩廣江浙各督撫通飭各海口設法嚴禁其洋船到奉時亦令該將軍等查察如有夾帶流寓人等照例遞回一山海關至古北口沿邊坍塌邊牆及九關台中後所等處或易冒險偷越或係往來稠密或爲各口出入總路自應一

體稽查應行令古北口提督奉天將軍府尹等照例辦理從之
東華錄三月甲午申禁民人出山海關

夏六月停奉天海運

清實錄六月癸巳諭據蘇昌奏稱奉天所屬地方六月初旬大雨連綿承德等縣山水驟發禾稼被淹夏麥歉收現在設法賑恤等語朕上年降旨將奉天海禁展限一年以接濟畿輔民食今直隸雨水均調秋成可望而奉天有被水情形若將海禁俟九月限滿之時方行停止恐商販衆多本地米價必致昂貴有妨民食可傳諭達勒當阿蘇昌斟酌本地情形應否卽行停止之處速行奏聞辦理至於賑恤災荒原以惠養本地土著民人各省定例以造入煙戶花冊爲憑流寓之人不在賑恤之內不

知奉天向來此等之人一體賑恤與否著蘇昌查明舊例速行具奏待朕降旨尋達勒當阿蘇昌會奏奉屬自被水之後糧價日增若俟限滿始停海禁恐兩月餘源源販運米價益昂有妨民食似應卽行停止臣等酌議行文沿海地方查察商販米價已載船者聽其販運其囤積存貯者令卽在奉屬照市價糶賣於商民兩有裨益報聞

賑奉天災

清實錄是月奉天府尹蘇昌條陳災賑事宜一奉屬州縣所轄遼闊每遇散賑赴城領糧往返維艱請將應賑糧石分貯四鄉適中之區腳價每石每百里給銀五分一查辦糧務一切吏胥紙筆飯食向無公項請定以大州縣四名中州縣三名小州

縣二名日給銀一錢自勘具日起至賑竣止一委員車馬旅費亦所必需請將試用州縣現任經歷州判教職每員日給銀三錢准帶跟役二名每名給銀五分巡檢典史每員給銀一錢五分准帶跟役一名均於庫貯雜項內動支得旨所議尙屬可行而實力稽察妥協辦理則汝一人之責也勉之

耆獻類徵

十一百六十九

蘇昌傳六月奉天各屬被水蘇昌條奏辦賑

三事一奉天向來辦賑因乏公項腳價無出並不於四鄉設廠各屬幅員遼闊村民赴城領賑往返數百里情殊可憫請照例分貯米石於四鄉適中之地腳價動正項覈銷一辦賑胥吏飯食紙筆之費因無項可動不無賠墊請酌州縣大小定其名數按日給費令不得借口需索一委員勘災監賑酌給盤費並跟

役飯食儻有通同侵欺等弊嚴參治罪諭曰所議尙屬可行而實力稽查妥協辦理則汝一人之責也勉之

秋七月允朝鮮國王奏請停止鳳凰城邊外墾田

清實錄七月己酉諭軍機大臣等朝鮮國王李昉奏稱臣聞今於鳳凰城邊外開墾莽牛哨地方設兵屯田信如臣所聞墾田設兵耕種則中間界河不能禁人往來竟成通衢將禁之難周戒之弗從臣國邊疆獲罪者自此始矣臣國上下人民不勝惶懼之至臣不得不據情陳奏等語見已交部議俟具奏時酌降諭旨觀該國王所奏蓋以其境內之人素有乘閒偷越空濩者若設兵巡察則伊等不得任意往來所奏亦屬卑鄙小國之人不識大體惟知縱下謀利不思寧定邊疆而故謂難行以試我

亦未可知再伊疏內有從前鳳凰城立界時曾留沿江曠地百餘里等語此蓋恐我於原留空地駐兵屯田逼近彼疆耳此等情節達爾黨阿於從前具奏時並未聲明殊屬錯謬且去年熊岳副都統鄂齊爾欲帶兵出鳳凰城行圍經守邊章京等以與朝鮮國止隔一江所關重大未許其行達爾黨阿亦曾將此事奏聞今此二處惟莽牛哨應行巡察遣副都統什勒們親往察看據稱中江東北哨二十里江中有一洲其北支水一曲卽莽牛哨地方江中有石一條卽係與朝鮮國分界處見在添撥官兵巡防皆在吾界內每年三月間遣舟師四名巡察於冰釋後撥二舟往守莽牛哨要隘其二舟輪流巡察所有官兵俱不許踰江中界若彼此各加嚴禁不至相通等語著仍照原議行勿

從其請其鳳凰城邊疆柵外餘地開墾耕種一事著照所請行
再達爾黨阿前奏請巡察莽牛哨時部議另詢之朝鮮國王再
行定擬經朕批改准行今朝鮮所奏若此則於彼國必有所不
便且雍正九年那蘇圖曾奏此事因朝鮮諄懇故未果行迄今
十餘年並無他故其巡察此處於我邊境有無裨益或於伊國
實有防礙之處著再行詳查俟文移往來得其情形辦理亦易
此次達爾黨阿若親往巡察誠恐聲張致啓疑端著不必去再
令副都統什勒們前往確察達爾黨阿亦當留心務將察看情
形據實奏聞不可迴護已往將此寄諭將軍達爾黨阿嚴飭邊
界官兵加意防察儻伊屬下人等妄滋事端達爾黨阿卽便宜
行事一面奏聞一面酌辦不可姑息亦不可輕率無論有事無

事惟以防守邊疆爲務

又七月甲寅兵部議奏朝鮮國王李昉奏近聞熊岳副都統來中江查閱邊界欲於莽牛哨添設屯兵鳳凰城展柵開墾伏念鳳凰城柵外曠地百餘里禁人居住以免溷雜今若墾土設屯則衣帶之水不足以限往來之路易於相通查康熙五十四年上國民人等有在土門江岸結屋居住者蒙聖祖仁皇帝撤毀雍正九年草薳河匯流欲設卡防守蒙世宗憲皇帝停罷乾隆二年內地商民議與中江交市又蒙皇上諭令中止今副都統來查之地卽雍正九年停罷防汛之所而今此設屯墾土之事比土門中江等事輕重相懸仰懇降旨停罷等語查奉天將軍達爾黨阿原議於莽牛哨添設官兵原因該處係內地邊界應

駐官兵彈壓復經查明江心有石嶼一道與朝鮮東西分界所
議駐兵處與該國界址尙隔巨浸卽開展邊界墾闢地畝亦係
內地不至雜擾且原議兵船於西岸停泊不許擅侵東界惟期
查拏奸匪以爲久遠安全之計則設汛之議不特邊境肅清於
外藩亦大有裨益應將該國王所奏均無庸議得旨莽牛哨添
設官兵巡查一案前據部議應再令該將軍悉心妥酌續據達
爾黨阿奏稱令熊岳副都統什勒們親往查看設汛之處與朝
鮮實不相通無慮溷雜滋擾且於內外俱屬有益經部覆准朕
已允行茲該國王陳奏前來以墾土設屯於伊國未便朕又敕
交部議該部以無庸議覆奏朕思我朝加恩朝鮮從來優渥今
莽牛哨添設官兵巡查一事旣經什勒們查明與該國界址無

慮溷雜滋擾且於內外俱屬有益而該國王又陳奏其不便情
詞懇切究未知該地實在情形如何著兵部尙書班第馳驛前
往同什勒們將彼地情形詳加察勘如果設汛之處係中國界
內與彼國毫不相涉則設兵置汛以杜奸宄所以肅清邊防自
屬應行之事卽該國王懇請亦不便准行若其地界或有犬牙
相錯難免溷淆之處亦卽據實奏聞候朕另降諭旨至從前議
准達爾黨阿所奏展邊墾土一案該國王旣稱鳳凰城樹柵之
外向留空地百餘里務使內外隔截以免人煙輳集溷雜滋事
之患此奏尙屬可行著將鳳凰城展柵之處照該國王所請停
止並令該部傳諭該國王知之

又七月丁巳諭朝鮮國王李昉奏請停止鳳凰城邊外墾田莽

牛哨地方添設巡察兵丁表內援引康熙五十四年奏請拆毀土門江岸所建廬舍禁止種田蒙聖祖仁皇帝恩准雍正九年奏請停止莽牛哨地方設立卡座蒙世宗憲皇帝恩准乾隆二年請罷中江互市亦蒙朕恩准各情節歷查舊案實係皆俯准所請行可知我欲舉行之事因伊奏請俱已停止此固懷柔小邦之意但屢以難行之事俯准所請輒爲停止於國家體制亦有不合轉爲輕視曷若不舉行之爲愈也此等情節著曉諭達爾黨阿凡事俱遵照舊制辦理似有此名無實礙難辦理之事著勿舉行後任將軍大臣不知復恐有欲如是辦理者著存記該處檔案以便永遠遵行

承德等縣水

清實錄是月奉天府府尹蘇昌奏承德海城蓋平廣寧四縣被水先經奏聞在案續據遼陽復州寧海錦縣寧遠義州等六州縣報稱六月間陰雨連綿河水漲發田禾被淹廬舍塌坍查奉屬被水十州縣惟廣寧地低災重臣委員查勘先給一月口糧餘照例次第辦理得旨覽奏俱悉如是則成災與不成災分數究屬輕重若何何不明悉奏聞耶尋奏據承德海城遼陽復州蓋平寧遠義州寧海等州縣陸續勘報係不成災惟廣寧地勢最低成災約七八九分不等而義州錦縣於查報後旋被雹災成災僅止一隅分數與廣寧相仿現經查明戶口分別賑恤得旨知道了督率屬員善爲妥辦奉省吏治頗屬廢弛汝宜加意也

八月復奉天各衙門筆帖式不拘旗分補用例

清實錄八月戊子奉天將軍達勒當阿議覆盛京兵部侍郎敷文奏稱盛京各衙門及外城額設滿洲筆帖式共一百三十六缺而不拘旗分補用續緣分別考取繙譯清字二項始經侍郎永福於乾隆元年奏准按旗均分乃更定之後各旗或有人無缺或有缺無人現正紅旗尙懸六缺無人可補而正白旗尙有前次之人守候無缺皆因分定旗缺所致請嗣後補用筆帖式仍照舊例不拘旗分但以考取名次高下爲補缺先後應如所請得旨下部議行

免奉天錢糧

清實錄八月己丑諭朕普免天下錢糧奉天省本年係輪蠲之

歲各省定例祇蠲地丁銀兩米豆不在應蠲之例但奉天省地丁錢糧向來銀糧並徵其額徵米豆卽係正賦著將奉錦二府乾隆十一年應徵米豆一體蠲免該部卽傳諭該府尹知之

允朝鮮國王奏請停止莽牛哨設汛

清實錄八月癸巳諭從前奉天將軍達爾黨阿具奏鳳凰城邊外莽牛哨設汛一案經部議覆准行續據朝鮮國王李昉奏稱與伊國不便朕降旨命尙書班第前往查勘今據班第奏稱查勘得彼地在我國界內與朝鮮國無涉雖與該國人等共涉一江若彼此不准越界各自約束所屬人等則不致滋擾永靖邊疆於伊國亦不無裨益此汛理宜安設等語由此觀之欲設汛之處在原定界址以內與朝鮮國邊界無涉矣唯是該國王世

戴國恩甚屬恭順若安設此汛彼國之無知小民儻有違禁者
伊恐獲罪是以奏請其安設此汛處雖有江灘分界兩岸不過
一二里之遙相隔甚近如伊屬下人等不能遵奉該國王禁令
以致該國王得罪朕心有所不忍著照該國王所請莽牛哨地
方添設汛兵之處停止令該國王將伊所屬人等嚴加約束至
於查拏內地偷越之人並應行呈報之處仍照原議實力奉行
不必交部再議該部卽傳諭該國王知之

又諭軍機大臣等鳳凰城邊外莽牛哨地方設卡一事據尙書
班第查勘奏稱此地在我境內與朝鮮無涉自應安設卡座但
距朝鮮邊疆較近彼此共由一江難保不相越境永不滋事等
語想來查拏偷越之人惟在該管大臣等實心任事所派之官

員竭力奉行耳如寧古塔所屬各卡反與偷越者潛通舞弊經阿蘭泰等查出且朝鮮歸化已久現在內地偷越之人伊等守卡者見之輒來具報此卽彼之畏法甚爲恭順今莽牛哨設卡一事已降旨俯准所請停止矣著寄諭達勒當阿卽照班第所奏惟在本境內嚴加查禁務將內地偷越之人淨其根株堵截緝捕並於高麗人偷越路經巡查之處加意實力奉行

九月派協辦大學士高斌往奉天疏濬河道

清實錄九月己亥大學士等議奏奉天將軍達勒當阿奏請派員查勘新開鷓鷹等河一摺查奉天所屬廣寧等處地勢低窪而新開鷓鷹等河向無河身遇雨水過多漫衍四出若開一大河引水歸海不特孔道鄉村可保無虞於旗民蕩田均有裨益

但盛京發祥之地開挖河道創興大工不可不詳細查勘請欽
派大臣一員並帶欽天監善看風水人等會同該將軍查勘定
議得旨依議著派高斌馳驛前往伊所帶章京官員亦著馳驛
定奉天清查流民事宜

清實錄九月庚子大學士等議覆奉天將軍達勒當阿奉天府
尹蘇昌條奏清查流民事宜內稱山海關至喜峯口邊牆坍塌
甚多游民勢必冒越請令直隸總督古北口提督再加汛守巡
查又九關台松子嶺兩處邊壕外與塔子溝地方相接每多私
越入境者亦請令督提等嚴飭巡查又關口稽察既嚴其由海
道隨赴奉天者勢所必有請無論商船人渡俱著於有官兵處
停泊以便稽查等語均應如所請辦理至所稱奉屬寓民應入

籍者准其入籍不願入籍者令其依限還鄉如有作奸犯科斷
難姑容嗣後無論新報入籍及商賈匠作傭工等一經犯法除
例應題報者候部覆遵行外其餘細事雜犯悉行遞回原籍安
插等語查奉天乃根本之地向來風俗淳厚今流民雜處恐其
漸染澆漓現在入籍必循分守法者方爲良民其作奸犯科之
徒固難寬縱但所犯科條自有輕重令該將軍所奏無論細事
雜犯皆遞回原籍未免竟無分別押解亦不勝煩應令按審情
罪分別辦理從之

耆獻類徵

十一百六

蘇昌傳九月奏請查游民三事一山海關迤

北至喜峰口一帶邊牆缺處游民冒險繞越請咨直隸總督古
北口提督巡防奉天沿西一帶交錦州副都統率該府加緊巡

十查一內地游民出古北喜峯等口由八溝塔子溝繞入奉天境內請令總督提督轉飭塔子溝通判河屯協副將實力巡查一奉天之南金復雄蓋四城與山東登萊二府相對商船私載民人勢所不免奉天甲丁散居屯莊輪班赴城供差似難坐守海濱各口又無墩堡請飭商船俱於有官兵處停泊上岸以便稽查如無引票卽遞回原籍下部議行

冬十月定旅順水師營巡查海疆島嶼制

清實錄十月丙子兵部議覆奉天將軍達勒當阿奏稱奉屬海疆島嶼最易藏奸請於每年五六月內飭旅順水師營官乘風浪平順時西至天橋廠巡查其船到船回日期令金州海口守汛放卡各官詳報而鳳凰城巡查之時令該城守尉詳報所有

巡防事宜令水師官兵等倍加嚴密等語均應如所請從之
嚴禁朝鮮越境挖參人犯

清實錄十月辛巳諭前經降旨停止莽牛哨地方安設卡座諭
令將軍達勒當阿在內地境內嚴加查察務將偷越出境之人
堵截緝捕並於朝鮮人越境巡探等事加意實力辦理矣今據
總督那蘇圖奏稱前在奉天將軍任時朝鮮人有越入內境挖
參者經我兵拏獲數百名並搜出多參等語從前該國人既有
結夥數百越境挖參之事今請停止安設卡座顯有縱容偷越
情弊著再寄諭將軍達勒當阿飭令守卡官兵於海岸路徑嚴
加防汛朝鮮有偷越挖參者實力查拏

十二月以特古斯額爾克圖襲科爾沁扎薩克多羅貝勒爵

清實錄十二月己卯以故科爾沁扎薩克多羅貝勒多爾濟子特古斯額爾克圖襲爵

十二年春二月命奉天永吉州改歸寧古塔將軍管轄

清實錄二月壬戌諭據寧古塔將軍阿蘭泰奏稱永吉一州設在吉林烏拉係寧古塔將軍所轄地方該州向隸奉天府一應辦理旗民事務俱申報府尹轉咨不但稽延時日且於辦理事件多至掣肘請將永吉州改設理事同知屬寧古塔將軍管轄等語著照該將軍所請其作何裁改一應事宜交部定議具奏添設盛京三陵領催

清實錄二月丁卯兵部議覆奉天將軍達勒當阿奏稱盛京三陵各設披甲八十名並未設領催請每旗添設領催一名率領

披甲巡查並掌管錢糧檔冊俟奉天本旗中公驍騎校缺出與本旗領催一同揀選記名補用應如所請但每旗一名爲數過多應照各陵例准其各設領催四名從之

撥遼陽開原廣寧應徵米石於內倉

清實錄二月丙戌戶部議准盛京戶部侍郎蘊著疏稱內倉應貯三年備用米六萬一千四百四十餘石現貯各項米通計二萬四千三百餘石尙不敷米二萬七千一百餘石請將遼陽開原廣寧應徵米石暫行撥入內倉計一年應徵米五千一百六十餘石六年可得米六萬一千四百餘石俟米石數日仍歸各該城交納從之

夏四月撤回盛京巡察官員

清實錄四月乙亥諭大學士九卿奏巡察御史應否差往兩議請旨差遣巡察官員原以令其稽查地方事務之廢弛近因按年輪派遂均視爲泛常毫無裨益反於地方滋擾殊非設立巡察之本意不若不必限年更替俟應查之時特派專員往查尙於事務有益盛京等處巡察官員俱照所奏卽令撤回每屆三年該衙門將應否差員之處請旨

又四月丙子諭曰盛京等處巡察官員昨已降旨撤回令每屆三年該衙門將應否差員之處請旨今思三年屆期一時差遣未必得如許賢員應分別年分陸續差遣方爲妥協其如何分年請旨並定立巡察條款著大學士九卿會同詳晰妥議具奏尋議盛京等處巡察應分三班盛京事較繁要應於乾隆己巳

年爲始派往庚午年派往黑龍江船廠二處辛未年派往歸化城游牧屆三年之期各該衙門再行奏派仍照舊例以一年爲期

六月禁商民海運奉天米石

清實錄五月奉天將軍達勒當阿奏現在雨澤稀少覺有旱象請豫籌接濟得旨覽奏俱悉若再不得雨澤夏禾或致成災有應籌接濟者速行奏聞毋致後時但奉天向爲產米之鄉邇來收成頗好何偶一旱歉便至拮据夫未雨之綢繆固宜早爲留意而鎮靜安詳以定民志尤根本之地最先務也

又六月丙寅諭前據達勒當阿奏稱五月以來雨未霑足已批令將應籌接濟之處速行奏聞未知近日曾否得有透雨秋禾

情形若何傳諭達勒當阿卽速具奏以慰朕念再現在雨水未足將來如有成災處所旗倉已經告匱民倉米石是否足資接濟抑或尙需若干石應通盤計算豫爲籌畫著達勒當阿會同該府尹詳悉計議作速奏聞以便早爲料理再前因山東需米曾詢問奉天米石可以撥運若干並令流通商販今奉天本處現既需米則撥運東省及通商販運之處俱不必行其海禁仍照例嚴查毋令奸商偷越一併諭達勒當阿阿里袞知之

秋九月撥奉天米於山東備賑

清實錄九月乙巳諭軍機大臣等前因山東被水地方賑貸需米曾將奉天米石可否運往東省接濟之處詢問達勒當阿等據奏奉天地方被災現在米價昂貴不能接濟東省續因降旨

截漕足數備用又經阿里袞奏明停止今據蘇昌奏報奉天各屬得雨後秋收豐稔米價自應平減而東省萊州等處被災較重正須賑貸之用可傳諭達勒當阿蘇昌令其就本處情形或可得十萬石或數萬石由海道運往東省於災地甚屬有益如果可行其作何運往之處卽一面辦理一面奏聞仍知會山東巡撫若不能得米卽不必知會山東惟將情節奏聞尋奏奉省今年秋收在七分以上糧價漸減辦米接濟山東於奉省旗民日食不致有虧現擬辦十萬石卽雇船先運三萬三千石赴萊州府交卸餘米咨明山東巡撫令於來春撥船赴奉領運下部知之

東華錄九月乙巳撥奉天米十萬石於山東備賑

冬十一月開奉天海運

清實錄十一月戊戌諭直隸總督那蘇圖奏稱天津靜海二縣今歲偏災較重現在加恩普賑但二縣地處窪下產米無多又僻在海隅商販稀少米無來路不得不爲明春豫籌調劑請暫開奉天海運等語著照所請准其暫開一年俟明歲秋收後停止

東華錄十一月戊戌以直隸天津靜海災命暫開奉天海運購糧接濟

十三年春二月增設牛莊蓋州防守尉

清實錄二月乙亥兵部議奏盛京將軍達勒當阿奏稱牛莊蓋州二處每城僅兵四百名無庸章京八員管轄而掌印章京與

各旗章京品級相等殊難管束請每城添設四品防守尉各一員裁章京四員改設驍騎校四員應如所奏其防守尉卽於所屬佐領防禦及閑散官員內揀送來京交該旗帶領引見補放所裁之防禦四員俟缺出坐補所添之驍騎校俟裁汰之防禦缺出時與記名之領催前鋒及應補驍騎校揀選題補從之

定盛京武職調補例

清實錄二月丙戌兵部議奏盛京將軍達勒當阿奏盛京武職不似各省但管兵丁如錦州廣寧遼陽牛莊蓋州等五城邊界遼闊內有盛京戶部包屯莊王公部頭莊院屯丁旗民人等雜處時有爭訟案件牛莊蓋州地臨海口船務尤繁鳳凰城與朝鮮接壤亦關重要中後所巨流河二路及法庫張武台松嶺子

九關台等處邊門各官均職任防守承辦地方事件非諳練勤幹之員不克勝任請酌定調補之例應如所請將前項作爲繁缺如不堪勝任卽於通省旗員內毋論是否本翼本旗揀選才具品級相當者題請調補仍將應得之缺抵還本旗其佐領以下毋庸引見至於城守尉協領四品守尉調繁調簡均令引見從之

復移羊腸河佐領回駐小黑山

清實錄二月癸巳議覆盛京將軍達勒當阿奏現住羊腸河之佐領康熙年間設塘兵時原派在小黑山地方駐劄彼時有佐領因羊腸河水草較好卽行居住而鈐記仍鑄小黑山字樣近年羊腸河連被水患不便駐劄請移於原指定之小黑山應如

所奏至搭蓋房屋地畝應照數撥與荒地令墾熟交還原主仍將實共需地若干並作何定限墾熟給還之處先行報部查核從之

牛馬稅課司火

清實錄二月甲午諭據盛京戶部侍郎富德奏稱牛馬稅課司失火所有房屋檔案等項俱被焚燬應將該監督常英照例交部議處俟伊任滿之日再將所交銀兩與前任監督等所交查對倘有缺少卽著落常英賠補照例治罪等語稅課司檔案甚關緊要觀此失火而焚燬檔案必有情弊富德彼時卽應提該監督之衙役將有無情弊之處詳細審明果無情弊祇照疏忽例查議尙可倘有情弊所收稅課卽多亦應從重治罪此時並

不詳究俟該監督任滿始行定奪卽有情弊已早得彌縫必至不能查出富德所奏甚屬糊塗著嚴加申飭令其將有無情弊之處詳悉查明具奏到日再降諭旨

三月定本科會試中額奉天一名

清實錄三月壬子禮部以會試中額請得旨這會試滿洲蒙古取中七名漢軍取中一名奉天取中一名

夏四月達勒當阿遷以阿蘭泰爲盛京將軍

清實錄四月癸酉以盛京將軍達勒當阿爲刑部尙書丁亥調寧古塔將軍阿蘭泰爲盛京將軍

耆獻類徵

七十二

達爾黨阿傳十三年四月授刑部尙書兼鑲藍

旗滿洲都統

又

二百八

阿蘭泰傳十三年四月調盛京將軍

六月許運奉天米石至山東糶賣

清實錄六月辛酉戶部議覆大學士高斌奏稱山東登萊青三府地無商販連年歉薄米石不敷請將奉天米石聽商民糶買由海運運東售賣等語係酌盈劑虛爲一時補救起見應如所請仍令東撫將運米若干酌定數目知會奉天並禁運他省其二省臨口州縣驗票稽查令仍照舊例行從之

秋九月命盛京選兵征金川

清實錄九月己未諭軍機大臣等金川至今未滅朕意欲派京師滿兵二千名東三省兵三千名前往東三省至京遼遠若非豫爲備辦恐致臨事周章可傳諭東三省將軍各於該管兵丁

內擇其人才壯健者豫派一千名候旨其帶領兵丁之大員盛京著副都統哲庫納黑龍江著派呼倫貝爾副都統楞圖

又十月壬午朔軍機大臣等議覆大兵進勦金川辦理起程事宜現在雲梯兵三百名業已起程其餘京兵及東三省兵共計四千七百名應分十六起每起三百名隔五日一次起程京兵於十一月初五日始先行起程盛京兵於十一月內船廠兵於十二月十五日黑龍江兵於十二月內盡數抵京卽備行裝自十二月初五日始隨京兵後次第起程

東華錄十月壬午朔調滿洲京兵雲梯兵及東三省兵共五千名赴大金川軍營聽用

查丈盛京各城馬廠並招墾荒地

清實錄九月庚辰戶部議盛京戶部侍郎德爾格等題覆乾隆四年郎中徐萬卷條奏查丈盛京各城界內馬廠等處長寬四至並荒地令查明招墾一案一鑲黃旗漢軍佐領李國宰等三佐領以山尖泡處馬廠窄小移住黃蠟坨子地方牧放並金州八旗增城東澄沙河等四處小馬廠向係六間不堪開墾應如所請准其移增並將馬廠坐落四至丈明造冊送部至三尖泡處舊廠內私墾地二十餘處應令照例入官變價其餘閑荒悉招旗人認墾輸租一長興島內旗民地畝現據該侍郎等查明已入紅冊者三萬八百九十八畝零但每年徵糧若干何年起科應令再查報部其車世烈等陸續私開地畝照例入官分別等則估價招旗人認買所遺荒甸招墾一山廠委員查丈立定

四至造冊送部私開地畝內鑲黃等旗八廠既屬廢棄應令估變招墾其英額林子等處丈出私墾地畝有礙地方應卽平毀仍飭該管地方官不時查察毋許私墾從之

冬十月停調盛京兵

清實錄十月壬寅諭軍機大臣等阿蘭泰辦理盛京兵丁旣已遲誤且盛京之兵亦不如索倫達呼爾其盛京兵一千名來京之處著卽停止但令哲庫諾一人來京應補盛京兵數者卽行文黑龍江將軍傅森挑選

十一月復調盛京兵赴金川

清實錄十一月丁卯諭統領盛京兵一千名著仍派副都統哲庫諾黑龍江前起兵一千名仍著博洛納統領後起一千名著

副都統黑雅圖統領

又諭曰盛京副都統哲庫諾來京奏稱伊起程來京時據盛京兵丁等泣訴我等已奉派出師今若不令前往實覺羞憤奉派兵丁一千名至今尙未散回恭候諭旨朕心實爲軫念欣悅可見我滿洲心誠氣壯勇往向前必能使膚功速奏較之綠旗兵丁不啻天壤若不准前往伊等實懷羞憤且伊等起程所費無幾不過將雲貴等處綠旗兵丁酌減萬餘可耳是以行令阿蘭泰將此項兵丁一千名作速令其起程於十二月初五六間到京可令經畧大學士知之

又十一月癸酉東三省官兵初隊自京師啓行上幸豐澤園賜將弁兵丁等宴並頒賞棉甲獎武金銀牌有差後每隊皆如之

十四年夏五月遣祭長白山醫巫閭山

清實錄五月己酉遣內閣學士世臣致祭長白山等處內閣學

士陳邦彥致祭醫巫閭山

秋八月定迎送朝鮮貢使各員處分

清實錄八月庚子禮部等議准盛京將軍阿蘭泰奏稱朝鮮國
貢使到邊輪站派官帶兵護送原令沿途彈壓查點至迎送通

官並不假以約束之權惟該員等與該國人情稔識或附和生

事許地方官申詳府尹咨部照不應重公罪杖八十律降二級

留任地方官豫備不周約束不嚴許護行官揭報府尹咨部照

違令公罪笞五十律罰俸九個月護行官看守不嚴許迎送通

官揭報該將軍咨部照防範不嚴例罰俸一年其或縱兵擾累

地方該管旗民官揭報該上司咨部照鈴束不嚴例除二級留任從之

九月移駐寧遠州中前所巡檢於前屯衛

清實錄九月癸丑吏部議准奉天府府尹蘇昌奏稱寧遠州巡檢一員向在中後所駐筭嗣因添設中後所州判時巡檢移於中前所分駐查中前所西至紅牆交界不過二十餘里東至中後所州判衙門則七十里有餘已非適中之地且戶口之附居中前所者爲數無多更有分駐佐領二員足資彈壓應請將中前所巡檢移入前屯衛駐筭就近稽察彈壓以衛東八里之凉水河爲界河以東州判管轄河以西巡檢管轄從之

又十五年十二月乙亥改鑄奉天寧遠州中前所巡檢印爲寧

遠州前屯衛巡檢印從府尹圖爾泰請也

冬十二月蘇昌遷以圖爾泰爲奉天府尹

清實錄十二月乙未以奉天府府尹蘇昌爲廣東巡撫工科給事中國爾泰爲奉天府府尹

耆獻類徵

十一百六

蘇昌傳十四年擢廣東巡撫

十五年春正月命奉天州縣缺出選用旗員

清實錄正月乙卯軍機大臣等議奏乾隆五年大學士等奏定

奉天流民准其情願入籍不願者定限十年陸續各回本處今

查十年期滿除工商傭作民人原許居住外其未經飭令回籍

者應令地方官速行查辦如有應予展限之處該將軍聲明請

旨此外游手之徒亦應確查驅逐嗣後內地流民應令旗民地

方官於奉天沿海一帶嚴行稽查並行文閩廣江浙山東各督撫查禁商船攜帶閒人再山海關喜峯口等處及九處邊門俱責成該管章京及州縣嚴禁再奉天十二州縣向用漢員其旗民交涉詞訟俱會各城旗員審理往往意見參差若竟以旗員選此十二州縣遇事不必會同辦理較爲畫一但一時更調未免紛紛請嗣後於此十二州縣內遇出缺卽令該部將候選旗員銓補則數年後該省州縣俱屬旗人於旗民交涉事件竟可專歸州縣審結徑報該處將軍查覈從之

東華錄正月甲寅命奉天州縣缺出選用旗員

會典事例九一三零十六年議准奉天案牘關涉旗民者多嗣後奉

天州縣缺出專用滿洲人員

五月移建寧遠州吏目衙署

清實錄五月辛亥移建奉天寧遠州吏目衙署於州署西從府尹圖爾泰請也

定養息牧等牧廠總管歸盛京將軍管轄

清實錄五月丁巳諭養息牧牧廠總管堆親已革去總管作爲三等侍衛此缺交領侍衛內大臣在頭等侍衛內揀選數人帶領引見嗣後養息牧牧廠總管歸於盛京將軍管轄

又五月庚申諭大凌河牧廠總管亦照養息牧之例歸盛京將軍管轄

秋八月盛京將軍阿蘭泰奏請以奉天流民有資產者作爲附籍不許

清實錄八月甲午諭奉天辦理流民一案前經降旨從寬予限十年令無資產者陸續回籍如已在奉省置有產業願編入奉籍者卽准入籍今據將軍阿蘭泰等摺奏流民內竟有置有產業不欲回籍而又不願編入奉籍者該將軍等請以附籍之名曲循其意辦理甚爲不合或因向來地方官辦理不善未經愷切曉示以致小民無知遲疑觀望耳著再加恩展限十年令該將軍並地方官等詳晰申明曉諭其在奉省本無產業者仍令陸續回籍外若在奉省置有產業何不卽入奉籍旣不欲回原籍而又不肯編入奉籍則是目無法紀怙惡不悛矣限期一滿定當嚴行治罪決不姑貸餘依議

九月遣祭長白山醫巫閭山

清實錄九月庚子朔諭長白山等處遣雅爾呼達致祭醫巫閭山赫赫致祭

冬十月命暫開奉天海運

清實錄十月丙戌諭軍機大臣等據直隸總督方觀承奏請暫開海運朕因天津等縣偏災實須接濟是以降旨允行向來天津歉收之年多從奉屬接濟此乃權衡盈絀酌盈劑虛之道可傳諭奉天將軍阿蘭泰府尹圖爾泰等令其酌量地方收穫照數運濟不得有意遏糴亦不得一任奸商借名偷買透漏太多轉致本地米貴並傳諭山東巡撫準泰一體實力稽查照票以除私販等弊尋阿蘭泰等奏除本年被災及產米無多之處難開海運外惟西錦州所屬之寧遠州現有收成轉運亦便應於

此處海口准買十萬石報聞

又十六年正月戊午諭軍機大臣等據總督方觀承奏稱奉天暫開海禁業蒙恩准臣遵卽酌量米數咨商盛京將軍等已經咨覆准買十萬石在寧遠州釣魚台海口糴運隨據商民呈請願赴錦縣採買應請聽其自往不必豫爲申禁等語著照所請傳諭將軍阿蘭泰令其勿拘定釣魚台一處海口如果錦縣易於赴買卽聽其買運毋庸禁阻以從民便

東華錄十月丙戌命暫開奉天海運

十一月恭送五朝實錄尊藏盛京

清實錄十一月癸卯上御太和殿恭送列聖御容供奉盛京並詣皇史宬恭送五朝實錄尊藏盛京

諭奉天毋禁陸路商販

清實錄十一月辛亥諭前因天津靜海等縣今歲被有偏災准方觀承所奏暫開奉天海運以資接濟海運既開則陸路商販自應聽其流運豈可復行禁遏乃近聞該將軍等於關外設卡嚴查陸運不通是因海禁暫弛而轉增閉糴之令大非朕一視同仁之意著該將軍等將新添卡路兵役撤回俾商販無阻糧價漸平庶於民食有益該部卽行文該將軍等知之

東華錄十一月辛亥飭奉天毋禁陸路商販

十二月賑盛京各處饑

清實錄十二月庚午朔賑卹盛京高麗堡舊邊甸驪河白旗堡二道京小黑山等六站本年分水災飢民有差

又十二月戊子蠲緩盛京遼陽廣寧岫巖開原鐵嶺鳳凰等七城本年分水災旗民額賦並賑卹有差

又十二月己丑加賑盛京承德遼陽鐵嶺開原錦縣廣寧等六州縣本年分水災飢民有差

十六年春二月改修海州倉廩

清實錄二月乙酉工部議准奉天府府尹圖爾泰疏稱海城縣額貯米豆及莊頭窖穀等項糧數甚多倉廩朽壞除該縣前經捐資粘補大倉六十三間外仍應修葺一百間請將舊百間拆卸併修五十間從之

三月復鐵嶺忠孝節義二祠祭銀

清實錄三月甲寅禮部等部議准奉天府府尹圖爾泰疏稱鐵

嶺縣向有忠孝節義二祠每年春秋致祭乾隆十三年府尹蘇昌於查奏各項祭祀案內因該縣率覆遺漏請仍照舊增立撥設祭銀從之

夏四月定本科會試中額奉天一名

清實錄四月戊辰朔禮部以會試中額請得旨這會試滿洲蒙古取中七名漢軍取中一名奉天取中一名
五月命奉天撥運倉存黑豆赴京倉

清實錄五月癸亥諭軍機大臣等前據奉天府府尹圖爾泰奏稱義州存倉黑豆除支給莊頭餒馬及撥補酌留豆石外尙餘黑豆一萬三千石有零遞年積累霉變堪虞請於義州及省城酌量減價平糶等語當經就摺批發但義州一倉餘豆既有一

萬三千餘石則所屬各倉諒必俱有多餘關東爲出產黑豆之地各處市價似不致甚昂卽有偶需平糶之處尙屬充裕京師官員兵丁餽養馬匹衆多非他處可比黑豆一項在所必需自應廣爲儲積以備支糶應於奉屬附近海口州縣內將此項徵收多餘豆石各按地方情形酌定數目每歲派撥一二萬石照乾隆四年海運之例由奉天海口運至通州交倉存貯其現在議裁養息牧馬匹二十二羣所有每年應支黑豆亦著一併運通如遇該省豆價平賤之年並可酌量動項採買隨船搭運以備京師平糶之用於官兵餽養馬匹實爲有益著傳諭該將軍府尹等令其詳確妥協定議具奏尋奏奉天錦寧廣義四倉每年徵收退地支放餘贖豆一萬七千餘石按年儘數運交如遇

豐收之年再照時價買貯一二萬石隨船搭運其民地項下黑豆各州縣額存自四千至六千石不等仍存倉貯錦寧二州縣除遞年糶借外餘豆二萬七百餘石全數起運至本年秋收徵還豆石亦仍留倉備用所有水陸運腳以及盤費等項俱照乾隆四年之例動給至養息牧裁減馬羣應支豆石一併運通之處另摺奏覆從之

又八月乙卯戶部議覆直隸總督方觀承奏稱前奉諭旨奉天支贖黑豆運交通倉豐收再行購買隨船搭運歲以爲常所有運豆船多用天津商艘請編字號以三十船爲一起給票按起發運水腳諸費無論海道內河均在直省司庫發給卽令奉天運員往至通倉交卸均應如所請從之

閏五月改寧遠州判爲旗缺

清實錄閏五月戊寅吏部等部議准奉天府府尹圖爾泰奏稱
寧遠州判一缺雖係佐貳凡戶婚田土等事俱令審辦請照奉
天州縣之例改設滿員又奉省風俗最爲淳厚充軍人犯聚集
習氣不無漸染請詞後編發奉天者改別省安置從之

秋七月免寧遠州欠糧

清實錄七月乙酉豁免奉天寧遠州乾隆七八年分民欠口糧
米四千二百石有奇八九年分民欠數種穀八百四十石有奇
東華錄七月乙酉免奉天寧遠州八年九年民欠

八月改鑄奉天將軍衙門左右兩司等關防圖記

清實錄八月癸卯兵部議覆盛京將軍阿蘭泰疏請改鑄奉天

將軍衙門左右兩司關防二八旗滿洲蒙古漢軍協領圖記十
一爲盛京字樣其協領圖記請照錦州熊岳協領及廣寧防守
尉一體改給關防再牛莊蓋州掌印章京業改爲防守尉亦請
改給防守尉關防應如所請從之

定法庫等十邊給發印票例

清實錄八月戊午軍機大臣等議覆山海關監督高誠奏稱前
經奉天將軍阿蘭泰奏准自法庫門起至明水塘十邊地方照
威遠堡等六邊之例一應商販出入俱由該地方給發印票邊
關官兵驗票放行但清河門九官台各地方產雜糧煙葉羊皮
瓜子等貨蒙古客商貿易隨到隨行進口車輛盈千累萬必一
一驗票放行行旅壅滯內地商販亦必畏難不前請照舊例免

其驗票查慎重邊防全在該管弁兵留心稽察如稽察不嚴卽
驗票放行難保一無偷漏徒使兵役借端滋擾應如所請十邊
地方凡商販蒙古人等載貨出入無庸驗票仍令該將軍實力
督察巡防從之

冬十二月遣祭長白山醫巫閭山
清實錄十二月己酉諭長白山等處遣赫赫致祭醫巫閭山遣
馬麟致祭

十七年春正月設盛京總管內務府大臣

清實錄正月庚辰設盛京總管內務府大臣諭曰盛京包衣三
旗佐領等官皆係職分相等之員並無統領辦事之人難保無
互相推諉及掣肘遺誤之處盛京地方最爲緊要應行設一總

管內務府大臣專轄將此永著爲令現應增設之缺著將軍阿蘭泰兼管

二月命奉天每年進生鹿

清實錄二月甲寅諭祭祀需用生鹿不必在太常寺餽養著交盛京將軍阿蘭泰每年合圍生鹿必獲五六十隻交內務府送靜宜園餽養遇祭祀需用若干數日前由該衙門行文內務府取用

夏四月移廣寧前屯衛巡檢駐白旗堡

清實錄四月壬寅吏部議准盛京將軍阿蘭泰等疏稱廣寧所屬地方相距程途不一該協領知縣等如遇要務公出橋梁道路有亟需修理之處必俟伊等查驗未免稽延請將前屯衛巡

春元通志 卷三十三
檢移駐白旗堡從之

改設養息牧哈岱郭洛副總管

清實錄四月丁未兵部議准盛京將軍阿蘭泰疏稱養息牧哈岱郭洛地方設牧羣三十除裁汰外現止八羣若仍前補放翼長二員未免浮冗請將翼長富勒赫革職員缺毋庸補放卽以現在六品翼長改授副總管嗣後六品副總管缺出照翼長缺出例揀選保送從之

定奉天海運通倉豆石章程

清實錄四月丁巳戶部議覆盛京將軍阿蘭泰條奏奉天海運通倉米豆章程一募船裝運應定期限上年運通豆石至津河凍難行嗣後錦屬州縣請於開印後十日內將應行起運數目

註明海口造冊移咨直督以文到日一月內募船出口奉屬於
船到日一月內裝運出口並將各日期呈報咨會稽查遲延照
漕運例處分無誤量加議敘應如所請至處分議敘之處運通
豆石不若漕運繁多無庸辦理一押運官兵盤費請照乾隆十
二年運東例官弁每員日給飯食銀一錢兵役每名日給五分
陸路回奉日給車腳銀一兩查乾隆十二年東省偏災急於運
米接濟是以議給飯食車腳銀今運通豆石歲以爲常若照東
例未免過多且回奉車腳一項作何分別給與官兵之處應令
該將軍再行妥議一海船鹹水浸潤最易發潮請照運東例每
豆百石准用蓆六領秫秸二十束爲墊艙之具應如所請事竣
報銷一沿途稽查奉屬委員俱係佐雜且係隔省請責成直屬

文武官弁一體嚴查以杜船戶水手攙雜沙土偷竊變賣諸弊亦應如所請令直督轉飭沿途地方官協同奉屬運員嚴查得旨依議行

八月定本科會試中額奉天一名

清實錄八月辛亥禮部以會試中額請得旨這會試滿洲蒙古取中七名漢軍取中一名奉天取中一名

是年圖爾泰遷以鄂寶爲奉天府尹

盛京阿志

四十一

鄂寶乾隆十七年任

按圖爾泰遷太僕寺少卿

十八年春正月鑄廣寧縣白旗堡巡檢印信

清實錄正月乙酉鑄給廣寧縣白旗堡巡檢印信從奉天府

尹鄂寶請也

夏四月定盛京各部司員補用例

清實錄四月乙巳諭盛京戶刑工三部郎中八缺著留戶部一缺用本處人員餘七缺並員外郎十六缺主事十七缺均以京員補用禮兵二部郎中四缺主事五缺均用本處人員員外郎八缺著以京員補用兵部一缺餘七缺留用本處人員

定中江稅務人員年滿更換例

清實錄四月戊申戶部奏查中江稅務遇更換之期例由盛京五部司員內揀派所有本處及由京補放人員俱可揀擬陪正今兩次所擬俱係本處人員恐遂相沿爲例應行文該將軍等嗣後年滿更換於本處及由京補放人員各揀一員擬定正陪送部引見報聞

六月允盛京兵部豫備巡幸馬匹車輛

清實錄六月己酉軍機大臣議覆盛京兵部侍郎卞塔海奏稱
來歲巡幸盛京凡經由程站驛馬車輛俱應豫行飭備查自沙
河站至舊邊十二驛馬每驛五十四匹請各添五十四匹盛京額七
十四匹添三十四匹穆奇沙爾濟噶布拉村三驛共五十四匹添五十
五匹自英莪門至尙家河向未設站請於馬前寨鳩河洛地方
添設二站並添馬七十匹以上統計應添馬九百三十五匹除
鳳凰城法庫等二路撤出六十四匹外尙多不敷請於大凌河養
息牧哈達郭洛等處牧羣內會同該總管挑備又沙河至盛京
腰站十三處各撥三十四匹盛京至馬前寨腰站五處各撥二十
匹請飭直隸總督於附近驛下酌撥又隨營馬請飭盛京將軍

於官馬項下撥三百匹備用車請飭奉天府尹於英莪盛京廣
寧寧遠等處各備五十輛往來馳送文件請飭盛京將軍於八
旗驍騎校內挑十二員兵二十四名分撥各站備遣均應如所
請從之

秋九月定盛京五部司員告病開缺例

清實錄九月丁卯盛京刑部侍郎吳達善奏請定告病開缺之
例查盛京五部司員有因病開缺者該部並未將告假月日先
行咨部註冊迨至開缺時祇於文內聲明該員病逾六月應行
開缺與在京官員告病豫行咨部註冊之例不符不無容隱廢
弛之弊請嗣後盛京五部官員除偶爾患病酌量給假外其有
調理須經數月者應照在京各部之例查明患病屬實豫將告

假月日行文盛京兵部咨部註冊限滿未愈照例取結移咨盛
京兵部轉咨吏部開缺下部議行

十九年春正月定盛京三陵掌關防官等揀補例

清實錄正月丙辰盛京將軍阿蘭泰奏查福陵昭陵掌關防官
缺出例由兩陵官員補放惟永陵事件向歸盛京禮部承辦其
掌關防官缺由五部郎中揀補尙膳正內管領缺由該部贊禮
郎揀補辦理殊未畫一請嗣後掌關防官缺出將三陵尙茶尙
膳正內管領一併揀選題補尙茶尙膳正內管領缺出將三陵
副管領一併揀選題補其補放永陵官員事件盛京禮部不必
兼理下軍機大臣等議行

裁養息牧正副總管歸翼長管理

清實錄正月戊午軍機大臣等議覆盛京禮部侍郎蘇章阿奏
稱養息牧牛羊共四十場向由京城蒙古官員內挑選四品總
管一員五品副總管二員俱非本處人不諳孳生之道請裁去
總管副總管三缺令本處翼長二員管理再於四十場內每場
各放牧長一名翼長每人月支餉銀二兩牧長支一兩如有倒
斃及孳生不足卽由該員等俸餉內坐扣賠補等語應如所請
惟查牧場雖分四十處儘可就近兼管臣等酌議由牧場蒙古
內共挑放牧長二十名每人管理二場分隸本處翼長總理從
之

二月以布彥德勒格爾襲科爾沁扎薩克輔國公爵

清實錄二月丁酉以科爾沁扎薩克輔國公喇嘛扎布子布彥

德勒格爾襲爵

定看守大政殿六品官缺爲公缺

清實錄二月甲辰吏部議准盛京將軍阿蘭泰等疏請嗣後看守大政殿六品官缺出准其作爲公缺該將軍會同該侍郎於盛京各部衙門滿洲漢軍筆帖式內揀選送部引見補放從之三月定本科會試中額奉天一名

清實錄三月丙子禮部以會試中額請得旨這會試滿洲蒙古取中六名漢軍取中一名奉天取中一名

秋七月帝自避暑山莊詣盛京謁陵

清實錄七月壬午上奉皇太后自避暑山莊啟鑾詣盛京謁陵丙申駐蹕舍哩河源丁酉駐蹕養息牧河東戊戌駐蹕彰武台

河東翌日如之庚子駐蹕邁拉河西辛丑駐蹕阿木薩爾河東
壬寅駐蹕漢湖圖克癸卯駐蹕克什克村乙巳駐蹕訥訥赫丙
午駐蹕固爾班格爾丁未駐蹕德爾班格爾

八月命阿蘭泰赴軍營帶兵以清保署盛京將軍

清實錄八月癸卯諭將軍阿蘭泰著赴軍營帶兵

伊時用兵

盛京

將軍事務著清保署理

九月帝至興京謁陵

清實錄八月戊申朔駐蹕布達朗郭勒己酉駐蹕袞河洛庚戌

駐蹕赫圖畢爾罕辛亥駐蹕伊拉璊河壬子駐蹕伊拉齊村西

癸丑駐蹕阿濟格綏哈西甲寅至吉林城至丙辰皆如之乙卯

上詣溫德亨山望祭殿望祭長白山神至松花江岸祭江神丁

已駐蹕喀木尼莊戊午駐蹕庫勒訥窩集昂阿己未駐蹕扎拉
芬阿林至辛酉皆如之壬戌駐蹕布爾罕癸亥駐蹕呼蘭河甲
子駐蹕都林河乙丑駐蹕鈕磨順河丙寅閱輝發城駐蹕城西
丁卯駐蹕費雅塔喇庫河戊辰駐蹕九河己巳駐蹕瓜齊顯鄂
佛羅翌日如之辛未駐蹕六格山壬申駐蹕小黃科翌日如之
甲戌駐蹕伊勒哈雅番北翌日如之丙子駐蹕德里倭赫九月
丁丑朔駐蹕烏蘇河戊寅駐蹕馬前寨己卯駐蹕油葫蘆村庚
辰駐蹕尙家河辛巳謁永陵閱興京城是日駐蹕額勒赫和羅
壬午行大饗禮是日駐蹕尙家河

賑奉天各州縣災

清實錄九月己卯諭曰朕恭奉皇太后東巡展謁祖陵所有經

過地方賜復蠲租一循彝典尤念今年奉天所屬州縣秋雨過多間被水潦雖高阜尙屬有秋但朕巡歷所經念茲貧民拮据益當加意惠鮮無令失所著該將軍府尹等查明被災地畝於恩旨蠲免外應作何分別優恤之處卽奏聞辦理

帝至盛京謁陵

清實錄九月癸未駐蹕蓮花套甲申駐蹕撫順乙酉駐蹕顏台尼嚕村丙戌謁福陵昭陵是日駐蹕毛軍屯丁亥行大饗禮入盛京駐蹕至癸巳皆如之

免盛京莊頭本年倉糧及興京等處米豆草束之半

清實錄九月己丑諭曰朕奉皇太后變再詣盛京恭謁祖陵禮成奉天所屬府州縣乾隆十九年地丁正項錢糧已降旨通行

蠲復所有各莊頭及旗地應納糧石草束等項自應一體加恩以普愷澤著將盛京戶部各莊頭本年應納倉糧一萬餘石概行蠲免盛京興京遼陽牛莊蓋州熊岳復州金州岫岩鳳凰城開原錦州寧遠廣寧義州等十五處旗地本年應納米豆草束免徵一半其各壯丁應完本年丁米亦著免其輸納俾旗民均霑嘉惠用昭慶典

諭盛京各官禁以詩酒陶情至廢公事

清實錄九月庚寅諭盛京爲我朝龍興重地自定鼎以來設立五部侍郎及奉天尹丞等官分理庶政教養旗民責任綦重且距京師僅千有餘里方今天下一家卽在漢人中猶不應稍存擇地之見況滿洲世僕豈可遂忘根本世臣本屬庸材麤通腐

文徒以資深擢用至盛京禮部侍郎乃其詩彙中至有霜侵鬢
朽歎途窮之句幾自擬於蘇軾之謫黃州試思以此較彼其品
其學與蘇軾執鞭將唾而箠之且卿貳崇階有何途窮之歎又
云秋色招人嬾上朝寅清重秩自應夙夜靖共乃以疏嬾鳴高
其何以爲庶寮表率又云半輪明月西沈夜應照長安爾我家
獨不思盛京固我豐沛舊鄉耶世臣居心不可問如此則昨之
革職發遣尙屬輕典夫縱情詩酒最爲居官惡習以滿員而官
盛京尙抑鬱無聊形諸吟詠則從前漢人之以出關爲畏途又
不足怪矣此地風俗素醇甚恐爲此輩所壞嗣後盛京各官當
深以此爲戒其有不思敬供厥職妄以詩酒陶情廢乃公事者
朕必重治其罪可將此旨各書一通懸之公署令觸目警心永

垂炯鑒

建盛京賢王祠

清實錄九月甲午諭曰朕由吉林至盛京周覽山川形勝敬稽實錄所載仰見列祖締造艱難維時宗室諸王克奮忠勤功成百戰開國訥運之勳彪炳簡冊深切景念思盛京爲龍興重地國初諸王功烈懋著如此並宜建祠以酬舊勳而示來許此地現有怡賢親王祠應將太廟配享之通達郡王武功郡王慧哲郡王宣獻郡王及禮烈親王饒餘敏親王鄭簡親王穎毅親王一併崇祀卽命曰賢王祠令所司春秋致祭應行典禮該部詳議以聞祠內碑亭可移於正中鐫勒此旨永昭我朝宗功元祀之鉅典尋議盛京怡賢親王祠正室五間請於室內分設三龕

每龕安奉三位中龕中奉通達郡王左武功郡王右慧哲郡王
左龕中奉宣獻郡王左禮烈親王右饒餘敏親王右龕中奉鄭
簡親王左穎毅親王右怡賢親王每龕各設一案每案用羊一
豕一果實五盤等一鑪一鐙二每位爵三素帛一欽定祠名上
諭碑文及神牌清漢字樣交內閣翰林院繕寫送盛京工部製
造鐫刻移建碑亭及祠內所供龕案尊爵鑪鐙帳幔並著敬謹
辦理每歲春秋二季令奉天府府尹承祭讀祝贊禮用盛京禮
部人員神牌入祠日先期開列盛京五部侍郎職名奏請遣員
讀文致祭從之

帝自盛京回鑾

清實錄九月甲午上自盛京奉皇太后啓鑾回京師是日駐蹕

舊邊東乙未駐蹕郭家屯翌日如之丁酉駐蹕小白旗堡戊戌
駐蹕羅家屯己亥駐蹕廣寧城西庚子駐蹕五臺子辛丑駐蹕
雙陽店壬寅駐蹕高橋癸卯駐蹕首山南甲辰駐蹕曲尺河堡
乙巳駐蹕葉家屯十月丙午朔駐蹕大石橋丁未駐蹕文殊庵
丙辰上奉皇太后還壽寧宮

冬十二月裁養息牧牧羣移歸大凌河牧養

清實錄十二月庚申軍機大臣等議覆盛京將軍阿蘭泰奏請
將養息牧牧羣裁歸大凌河牧養等語查養息牧現有騶馬二
羣騾馬六羣滋生有限需費繁多應准移於大凌河被汰牧長
人等均照十五年之例辦理至養息牧騶馬均歸大凌河騶馬
羣內騾馬爲數較多請另設四羣各五百匹餘勻入大凌河騾

馬羣內草豆照大凌河例支給每羣各設牧長一員副牧長一員牧副一員牧丁十五名應添牧長等令總管揀補牧丁請於大凌河馴馬十羣每羣牧丁二十五名內各酌裁五名撥補尙少十名亦令總管揀補其養息牧原給關防交禮部銷燬再養息牧口外牧廠留歸大凌河牧放口內牧廠交該將軍酌辦從之

二十年夏五月賑奉天各屬饑

清實錄五月丁丑緩徵奉天承德遼陽海城鐵嶺開原錦縣廣寧七州縣水災額賦兼賑饑民

六月遣祭長白山醫巫閭山

清實錄六月己巳諭長白山等處遣世貴致祭醫巫閭山遣楊

嗣璟致祭

秋七月晉盛京將軍阿蘭泰男爵

清實錄七月丁亥諭曰阿蘭泰自出兵以來奮勉效力擒獲達瓦齊實屬可嘉著加恩賞給世襲男爵

冬十月鄂寶遷以恩不爲奉天府尹

清實錄十月甲辰以奉天府尹鄂寶署廣西巡撫

又十月丙午以兵科給事中恩不爲奉天府尹

定盛京大政殿朝期覈對職名例

清實錄十月甲寅禮部議准盛京禮部侍郎卞塔海奏稱盛京大政殿每月逢五朝期請照京城例各衙門先將職名造冊咨送至期覈對如無故不到及越次失儀者糾參從之

十二月免盛京買田畝上稅

清實錄十二月戊午盛京戶部侍郎赫赫奏盛京等處買房產田畝均請上稅得旨盛京等處買房產有上稅者亦有不上稅者自應一體上稅至買田畝從無上稅之例遽令上稅於民不便但不與以執照日久不免爭端嗣後買田畝著不必上稅但至稅務處遞呈領照其如何給照並查覈定擬之處著交部議奏

二十一年春三月阿蘭泰革實授清保爲盛京將軍

清實錄三月己巳朔諭據阿蘭泰奏稱訥默庫等已經擒獲現在解京等語此事係舒明籌辦甚屬妥協阿蘭泰一味推諉若照伊所奏辦理必致遲誤著將阿蘭泰男爵革去交部嚴察議

奏實授清保爲盛京將軍

夏五月舉行奉天本年京察

清實錄五月乙未京察本年盛京各官才力不及者一員罷軟無能者一員分別處分如例

冬十二月更定盛京兵部漢軍筆帖式補缺例

清實錄十二月癸酉吏部議准盛京兵部侍郎富僧額奏稱盛京各部衙門滿洲筆帖式向例不分旗分於考取繙譯人員內挨補蒙古筆帖式由京補放惟漢軍筆帖式十缺論旗補放八缺其二缺作爲兩翼公缺補用選法不一請嗣後漢軍筆帖式缺出毋庸拘定本旗卽照現在額缺作爲左右兩翼缺出於考取人員內挨補從之

二十二年春三月定本科會試中額奉天一名

重出

清實錄三月己未禮部以會試中額請得旨這會試滿洲蒙古

取中六名漢軍取中一名奉天取中一名

二十三年春二月舉行乾隆二十二年大計

清實錄二月甲戌舉行乾隆二十二年分大計奉天卓異官二

員年老官二員分別陞賞處分如例

二十四年春正月恩不遷以通福壽爲奉天府尹

清實錄正月癸卯恩不著留京署理工部侍郎其奉天府府尹

員缺著通福壽補授

夏四月許奉天運木回津船隻採運米穀

清實錄四月庚申諭據官著奏奉天運木回空船隻向俱收買

蘇豆壓載回津今津屬米價稍貴請順帶米穀以資平糶等語
上年奉天收成豐稔米穀頗多現在津屬糧價既昂挹彼注茲
自可通融接濟已傳諭奉天將軍酌量籌畫聽其採買運載該
鹽政卽行出示曉諭受雇船戶人等令其於運木回空時卽可
裝載來津出糶則市價可平而民食亦自當充裕矣

五月定盛京五部將軍衙門筆帖式擬補例

清實錄五月己丑吏部議准盛京兵部侍郎果勒敏奏稱威遠
堡等處十五邊口筆帖式定以歷俸八年遇盛部五部將軍衙
門筆帖式缺出按次調補之員報部註冊所遺邊口筆帖式員
缺於考取應用人員照例擬補其現任各邊口筆帖式如有歷
俸已滿八年者卽照此例辦理倘遇盛京五部將軍衙門筆帖

式缺出無合例調補之人仍將應補人員擬補送部從之

秋七月以垂扎布襲科爾沁扎薩克和碩土謝圖親王爵

十清實錄七月辛酉以故科爾沁扎薩克和碩土謝圖親王阿喇

布坦子垂扎布襲爵

八月撥奉天糧石運直賑糶

清實錄八月己丑諭據方觀承奏直屬現在需用米糧欲將銀

十萬兩赴奉天等處採買由海運直等語著傳諭清保通福壽

等令其查明該處各倉內有糧石寬裕足資協濟之用者酌量

湊撥一面奏聞一面知會直督彼此酌派妥員運送接收卽於

附近水次由海載運以資接濟

冬十月振盛京等處災

清實錄十月乙未賑盛京城承德縣鐵嶺城鐵嶺縣開原城開
原縣錦州城錦縣寧遠城寧遠州廣寧城廣寧縣義州城義州
等處本年旱災旗民並蠲緩額賦如例

遣祭盛京三陵

清實錄十月庚子定邊右副將軍富德等奏到巴達克山素勒
坦沙獻逆賊霍集占首級全部納款捷音諭此皆仰荷上蒼福
祐宗社鴻庥俾朕得纘皇祖皇考未竟之不緒盛京三陵禮應
親謁叩謝但以序屆冬寒恐勤屬車之衆特遣親王前往恭代
十一月遣祭長白山醫巫閭山

清實錄十一月丁卯禮部奏請遣官告祭嶽鎮海瀆

按以回部
歸誠故部

得旨長白山等處遣儲麟趾致祭醫巫閭山遣世貴致祭

二十五年春二月免奉天十九驛旱災額賦

清實錄二月辛卯蠲免奉天盛京驛舊邊甸驪河白旗堡二道
京小黑山廣寧易路開原噶布拉村法庫東關寧遠高橋小凌
河沙河站十三山連山關嚴千戶屯等十九驛乾隆二十四年
旱災額賦並分別加賑

三月定本科會試中額奉天一名

重出但滿蒙中額不同

清實錄三月庚午禮部以會試中額請得旨這會試滿洲蒙古
取中三名漢軍取中一名奉天取中一名

夏四月鑄給盛京葭場關防

清實錄四月己丑軍機大臣等議奏三姓副都統富僧阿奏稱
盛京吉林寧古塔等處葭場放票收葭文移所關甚要請各按

地名鑄給關防從之

秋七月命盛京滿洲地名仍用清語

清實錄七月甲辰諭盛京瑪爾吞地方彼方漢人俱以馬二屯呼之盛京所屬地名多係清語今因彼處漢人不能清語誤以漢名呼之若不及時改正日久原名必致泯滅著傳諭將軍清保等所有盛京滿洲地名漢人誤以漢名傳呼者令俱查改仍呼原名並嚴飭彼處人等知之

二十六年春正月舉行乾隆二十五年奉天大計

清實錄正月己丑舉行乾隆二十五年大計奉天年老官二員處分如例

三月定本科會試中額奉天一名

清實錄三月甲子禮部以會試中額請得旨滿洲蒙古取中四名漢軍取中二名奉天取中一名

夏四月以恭格喇布坦襲科爾沁和碩親王爵

清實錄四月戊子以故科爾沁和碩親王扎木素子恭格喇布坦襲爵

冬十二月定盛京旗人進山海關給票例

清實錄十二月甲申兵部議覆山海關副都統富當阿奏稱旗人進關而無印票稽察無由恐有逃匪混入查吉林黑龍江拉林阿勒楚喀等處旗人進口俱有該管官印票關防請畫一辦理應如所奏嗣後盛京旗人進關附近省城居住者用將軍印票在各小城居住者卽用該管官關防圖記從之

移小凌河驛於雙陽店

清實錄十二月己丑軍機大臣等議准盛京兵部侍郎果勒敏奏小凌河驛站地窪遇河水漲溢站房被衝請將該驛移設雙楊店地方從之

二十七年夏閏五月清保遷以舍圖肯爲盛京將軍

清實錄閏五月癸亥朔以盛京將軍清保署正白旗漢軍都統調福州將軍舍圖肯爲盛京將軍

命奉天運豆進京備糶

夏清實錄閏五月甲午諭京師閏五月以來雨水稍多近雖晴霽而道路泥濘商販駛運未免紆遲豆價現在增長官員兵丁日所必需自宜酌量調劑現已降旨令奉天速運豆石接濟京倉

支放之用該部遵諭速行

又諭軍機大臣等京師近因雨水稍多豆價增長奉天上年豆石收成豐稔著傳諭該府尹就本年通融酌辦於粟米改徵豆石內儘數籌撥或有不敷就近設法購買總以得五萬石爲率卽由海道迅速運京毋稍遲誤

東華錄閏五月甲午命奉天運豆進京備糶

展盛京清查開墾地畝限

清實錄六月丙午諭軍機大臣等據阿永阿朝銓奏稱清查盛京開墾地畝每年冬三月及春季二月間方可按畝清查請賞限三年清查完結等語卽照所請但查覈既需三年之久阿永阿不必在彼守候著卽回京其查覈開墾事件交朝銓等辦理

奉天通志 卷三十三 四十四
將此傳諭知之

編立奉天流寓養蠶民人保甲

清實錄六月丁未軍機大臣等議覆欽差刑部右侍郎阿永阿等奏稱奉省所屬錦復熊蓋等處沿山濱海山多柞樹可以養蠶織造繭綢現在山東流寓民人搭蓋窩棚俱以養蠶爲業春夏二季放蠶食葉分界把持蠶事畢則撚線度日聚賭鬪毆之事不一而足此等民人應交該處旗民官查明編立保甲設立棚長牌頭管束倘有生事不法分別情罪辦理其自山東航海來者若無票船隻及有票而票內無名之人一併嚴查照例治罪應如所請從之

秋七月命查朝鮮越邊人民

清實錄七月壬戌諭軍機大臣等朝銓等奏朝鮮國民由何處進邊三水府之嘉義普正地方係屬何省無憑可查等語前禮部奏朝鮮國咨稱逃人越境一事卽傳諭盛京吉林將軍等嚴查嗣據恆祿奏三水府嘉義普正與盛京所屬地方相值等語恐伊等察勘未周因諭朝銓詳查今覽朝銓所奏復互相推諉朝鮮邊境與盛京吉林接壤不出於彼卽出於此況朝鮮咨文內稱有三水府嘉義普正奸民沿海滋事看來朝鮮民人過江卽入嘉義普正其他與盛京相值卽盛京所屬與吉林相值卽吉林所屬有何難查之處而乃彼此推諉惡習相沿如此試思今縱查出不過得失察之咎耳因避小處分而隱匿欺罔致干大戾孰輕孰重伊等何不知之此事雖小不可不明白查辦著

奉天通志 卷三十三 四十五
交恆祿布顏達賴伊二人親赴朝鮮邊境詳加查勘具奏朝鮮
國逃亡人李元三現在境內與否飭地方官嚴行緝捕此案盛
京吉林將軍等雖未奏聞曾否報部之處亦著查明具奏

暫開奉天海禁一年

清實錄七月丁卯諭奉天直隸海船往來運販米豆雜糧向有
例禁今夏近京一帶雨水過多市價未免稍昂而奉屬連年豐
稔若令商販流通於小民生計甚有裨益著暫開海禁一年俟
明歲秋收後再行停止至商販船隻出入應行驗票稽查其由
京往奉省者令於步軍統領衙門給票由奉來京者於奉天將
軍衙門給票各州縣往奉省者於直隸總督衙門給票庶彼此
察覈有憑可杜冒濫諸弊著直隸總督奉天將軍府尹會同酌

定章程妥協辦理

定錦州等處副都統稽察海口例

清實錄是月盛京刑部侍郎署將軍事朝銓奏盛京所屬海口商船雲集於民用有裨惟該地方旗民官員均有稽察盤驗之責若勒索留難勢必擾累查錦州蓋州牛莊等處海口均有副都統管理三處請卽交各該副都統稽察倘有情弊卽咨參究治該副都統等或任地方官欺隱朦混一併察處得旨如所議行

冬十月派蔣炳赴奉天查審治中高錦收受海船陋規案件

清實錄十月壬辰盛京將軍舍圖肯府尹通福壽等參奏奉天府治中高錦巡察海船收受陋規得旨著派倉場侍郎蔣炳馳

奉天通志 卷三十三
驛前往會同查審

命嚴治奉天赫木地方偷葭人犯

清實錄十月甲寅諭據舍圖肯奏稱聞赫木地方有偷葭人等因派前鋒章京帶領前鋒協同番役往拿伊等擅將番役細縛毆打經總管什格拿獲王惠等十一人其餘韓雲等現俱脫逃等語此等偷葭重犯舍圖肯既派官兵協同番役往拿何以悉被毆打且致多人脫逃著傳諭舍圖肯將現在拿獲之人訊明伊等黨羽若干籍隸何處現在逃往何方逐細研究交該地方官盡數查拿勿使一人漏網今奉天風氣日頹舍圖肯身為將軍宜極力整頓不可仍前廢弛

奉天府尹通福壽解任

清實錄十月丁巳諭據安泰等奏審訊奉天府治中高錦勒借店戶銀兩詳稱收受陋規一案內稱高錦屢經差委聲名狼籍府尹通福壽不但漫無覺察又復屢次保舉徇縱顯然同時將軍衙門之委查協領伊昌阿等亦俱得過陋規等語通福壽著解任質審伊昌阿著革職

又十一月丙寅欽差戶部侍郎安泰等奏審訊奉天府府尹通福壽徇縱屬員高錦收受陋規一案查有高錦餽送通福壽銀兩等情得旨通福壽著革職所有收受銀兩情節著交與安泰等一併嚴審究擬具奏

十一月命安放新修寶譜及將軍印譜於盛京鳳凰樓

清實錄十一月壬戌諭新修寶譜及將軍印譜解送盛京後著

安放鳳凰樓存貯十寶之次從前所修寶譜及將軍印譜或貯庫或貯將軍衙門著照京師分貯交泰殿內閣之例辦理

以耀海爲奉天府尹

清實錄十一月乙丑以光祿寺卿耀海爲奉天府府尹

十二月命嚴緝賽馬集糾衆毆擊巡查私葭領催人犯

清實錄十二月戊戌諭據舍圖肯奏派往巡查私葭之署領催富昌阿等行至賽馬集有郭衛等帶領四十餘人將伊等細打城守尉官忠比時不卽嚴拏防禦額爾格訥不行親捕止遣領催察罕往拿以致全犯逃逸等語盛京積習頹壞已極屢有此等事件殊屬不法逃犯郭衛等著交該將軍開明名姓年貌行咨原籍督撫務期盡數捕獲城守尉官忠防禦額爾格訥領催

察罕等俱著革職解交刑部從重治罪該管各州縣平日不能約束臨時又不實力協捕所司何事亦交該將軍一併查參定盛京將軍節制奉天府府尹例

清實錄十二月己亥定盛京將軍節制奉天府府尹例諭向例盛京將軍管轄旗人奉天府府尹兼理民事原無統轄嗣因盛京係滿洲根本之地所有州縣官員皆定爲滿缺凡應行查拿私葭經將軍派委官兵前往地方各官自宜會同查緝乃近日拒捕毆差之事不一而足地方官竟視同膜外鄉長保甲並不協力擒捕此皆因將軍府尹不相關涉各分畛域之所致是以各屬員亦存旗民分管意見並不和衷辦理於地方事務甚無裨益不可不爲變通在府尹爲全省大吏雖不可便爲將軍屬

奉天通志 卷三十三 大清二十三年 四十八
員亦當令其聽將軍節制庶旗民事務歸一一切辦理不致參差嗣後奉天府尹著聽將軍節制遇有應行查拿人犯該地方州縣官卽協同將軍差委之人協力查拿如仍有似此拒捕毆差以及脫逃等事將該地方官交部一併治罪

定簡放盛京副都統城守尉例

清實錄十二月己亥定簡放東三省副都統城守尉例諭盛京吉林黑龍江等處向因風俗淳樸地方寧謐是以三省旗員皆放本處之人卽副都統城守尉大員亦有簡放本處者據今看來大非昔比犯人偷濩拒捕種種不法皆由該管官員平日互相徇縱不能約束所致該處大員之缺若仍放本處之人彼此迴護頽俗斷難整飭嗣後遇有東三省副都統城守尉缺出或

由京師遣往或於別省調補著交該部臨時將在京及各省應放應調人員開列職名請旨著爲例

申飭盛京禮部侍郎卞塔海以辦理朝鮮國民越境偷貂事件

清實錄十二月丙午諭軍機大臣等卞塔海等奏查辦越境偷打貂皮高麗人金永官等一摺所擬甚屬錯謬朝鮮世爲本朝臣僕於藩部中至爲藐小該國旣不能約束此等匪犯潛行鼠竊則將該犯交與治罪外該國王尙當移文嚴飭至貂皮等物雖無足重輕但一經追出自應照例入官何得一併請交該國辦理重乖國家體制在伊等不識事理一切爲就事了事起見且若總總過慮惟恐別生邊釁者然殊不思朝廷駕馭屬國稍涉遷就調停所關綦重況國朝撫戢四裔其中卽有遐荒強悍

奉天通志 卷三十三 四十九
什百高麗者無不震讐受命遇事惟知執法處治而又何有於
高麗摺內所議背理之處已令軍機大臣刪節交部矣卞塔海
等著傳旨嚴行申飭並詳悉諭令知之

朝鮮英宗實錄三十九年五月乙亥清禮部咨文來部邊民金
順京等犯越具由送咨且陳邊臣革職至是清回咨止之

二十八年春正月修盛京句驪河西橋道

清實錄正月丁卯盛京將軍舍圖肯奏廣寧縣有生息銀兩備
修呂陽驛至句驪河一帶道路橋梁查句驪河西地勢低窪溪
澗復多雨積淹溢差役商賈不便請會同盛京工部奉天府尹
選員濬修報聞

東華錄正月丁卯修盛京句驪河西橋道

二月弛奉天海禁

清實錄二月己丑朔軍機大臣等議覆奉天將軍舍圖肯奏稱盛京遇豐收年不准外運則穀賤傷農請嗣後停禁海運卽歉歲價不過昂亦准載運但不得過多以致穀貴僑民請勅下奉天將軍府尹派妥員嚴查從之

三月定本科會試中額奉天一名

又重出何故

清實錄三月甲申禮部以會試中額請得旨這會試滿洲蒙古取中三名漢軍取中一名奉天取中一名

夏四月鑄錦州所屬四處邊口章京圖記

清實錄四月丙午鑄給奉天錦州屬梨樹溝明水塘清河白土廠四處邊口章京圖記從副都統恩不請也

停奉天購運直隸米石

清實錄四月壬子盛京將軍舍圖肯奉天府府尹耀海等奏承德遼陽海城蓋平鐵嶺錦州寧遠廣寧義州九州縣粟米價自八錢至一兩四錢不等高粱價自五錢五分至八錢四分不等均可採買運直此項米價及由陸至海運費需銀甚多請於盛京戶部撥銀二十萬兩得旨請撥庫項購米未免周折卽於旗民倉存米內撥運二十萬石亦足敷用

秋七月改正盛京兵操演期

清實錄七月丙子盛京將軍舍圖肯等奏盛京兵共計一萬七千九百餘名每年操演春季自正月十六日起至三月十六日止秋季自七月十六日起至九月十六日止每季操演兩月定

例一月操演六次查盛京兵多係耕種謀生更有居趾離城數
百里者若拘成例未免有誤農時且地方氣候更寒三月內始
可耕作請嗣後春自二月初一日起至三月初一日止秋自九
月初一日起至十月初一日止一月內逐日操演庶不致有誤
春耕秋穫之期亦不致廢弛演習得旨如所請行

二十九年春正月諭盛京將軍朝鮮劫殺人犯卽於內地正法

清實錄正月庚午諭從前朝鮮國人有在內地強劫故殺等事
將伊等審明定罪解回監禁勾到後卽在彼處正法但彼處實
係正法與否無憑可查著傳諭舍圖肯等嗣後朝鮮國人如有
強劫故殺等案罪應斬決者不必解回本國卽於內地正法但
行知該國可也

選盛京錫伯兵移駐伊犁

清實錄正月乙亥軍機大臣等奏據盛京將軍舍圖肯等奏稱遵旨於盛京錫伯兵內挑選一千名挈眷移駐伊犁應照索倫兵丁之例派員管理請選防禦驍騎校各十員帶領出彰武台由台站前往仍請交理藩院派筆帖式領催各二員送至烏里雅蘇台至官員兵丁應領俸餉約須銀十萬兩就近於盛京戶部支領再每起另添派協領城守尉各一章京四前鋒一百照看約束送至邊門等語臣等酌議從前索倫察哈爾兵移駐伊犁派有總管協領大員直送至該處今舍圖肯所奏選派官員送至邊門並未計及長途護送之人應令派協領城守尉各一員送至伊犁其章京前鋒不必派出官員兵丁俸餉准其照例

辦理從之

二月子茂沁襲科爾沁一等子爵

清實錄二月丙申予故科爾沁一等子固魯扎布子茂沁襲職

改錦州理事通判爲管轄興京等處理事通判換鑄關防

清實錄二月丙午改鑄奉天錦州理事通判關防爲管轄興京等處理事通判關防從府尹耀海請也

會典事例

九一零

二十八年設興京理事通判一人

三月刑部司官前往盛京會審朝鮮土兵殺傷披甲案件

清實錄三月乙亥禮部奏朝鮮國土兵金世永等六人殺傷披

甲常德身死一案該國王李昉審錄供情尙屬含糊未便遽成

信讞請簡員會審得旨著派刑部司官一員前往盛京會審餘

奉天通志 卷三十三 依議

夏四月選盛京錫伯兵移駐塔爾巴哈台

清實錄四月庚子盛京將軍舍圖肯等奏據兵部移咨內開軍機大臣議准盛京錫伯官兵內挑選一千名攜眷發往塔爾巴哈台駐防遵照索倫察哈爾之例辦理但前次派往伊犁索倫察哈爾兵每兵百名有佐領驍騎校各一員五百名有協領二員管轄此次所撥錫伯兵應於伊犁滿洲大員內揀派協領二員分翼管理再於現在防禦內派數員作爲佐領分管又查從前索倫察哈爾等兵移駐伊犁時俱派總管協領等大員送往今錫伯兵臣卽揀派協領二員防禦十員驍騎校十員送至該處得旨知道了如有私行逃走者著嚴行查拿具奏若未經奏

聞由他處發覺惟爾等是問

冬十月定興京鳳凰城城守尉就近相驗例

清實錄十月癸巳吏部等部議覆盛京將軍舍圖肯奉天府尹
尹耀海等奏稱奉屬十二州縣已改滿員嗣後請將旗民徒罪
以下事件責令各城就近辦理俟完結之日呈報將軍府尹查
覈一面知照該管旗員約束至命盜重案及實犯軍流者旗人
由州縣呈送盛京刑部辦理民人由州縣詳解府尹覆覈題咨
又緝兇捕盜案件均應責歸民員但奉屬地方遼闊旗民雜處
稽查非易各城旗員亦有地方之責倘有匪類不法等事卽令
查拿移送州縣辦理疏防失察照綠營武弁例與文員一體查
參其州縣審案內遇有應訊旗人如尋常人犯仍移關旗員查

提緊要重犯一面移會旗員查拿外應令各州縣徑行緝拿又興京熊岳通判分管界址應以鳳凰城岫巖適中之哨子河爲界熊岳城界於蓋平復州之間而岫巖城亦與蓋平復州寧海等州縣連界經管向有定界應照舊辦理其興京所屬撫順地方距興京城一百八十餘里向歸承德經管應照從前原定界址以二道房身爲界開原鐵嶺遼陽熊岳等處以興京鳳凰城岫巖二城向定旗界爲準興京鳳凰城二城向未設有專管文員命盜等案俱係旗員辦理今錦州通判移駐興京地方案件應均歸該通判辦理但興京距鳳凰城三百八十里鳳凰城至哨子河一百二十里熊岳距岫巖二百餘里岫巖至哨子河一百二十里道路遙遠往返需時誠恐屍軀易腐難以相驗劫奪

案件更難及時查拿應仍責令二城城守尉就近相驗嚴緝兇手一面移知該通判審訊其緝捕不力處分應與通判等一體查議均應如所請從之

十二月以遜達布襲科爾沁頭等台吉職

清實錄十二月戊子以故科爾沁頭等台吉達爾漢朋蘇克子遜達布襲職

三十年春三月修盛京地震倒塌官房

清實錄三月丙申諭據舍圖肯等奏稱地震倒塌官鋪房間請動滋生餘息銀兩交與承辦滋生銀兩官員會同工部委員監修其將軍衙門等處官房請交盛京工部修理等語舍圖肯所奏應修各項官房及官鋪房間甚多需帑浩繁若僅委屬員承

春月通志 卷三十三 五十四
修難免浮冒開銷所有各工著交舍圖肯倭陞額會同該部侍郎督率修理毋令下屬任意冒銷

秋七月添建熊岳等五處倉廩

清實錄七月丁丑添建熊岳金州鳳凰城開原牛莊五處倉廩從盛京將軍舍圖肯請也

命考試盛京宗室覺羅等學

清實錄七月庚子諭據永瑋奏稱盛京宗室覺羅等學原定五年一次奏派大臣考試自乾隆二年起節經展限並未舉行本年又屆五年期滿請派盛京侍郎一二人會同臣及將軍考試等語盛京宗室覺羅等學五年一次考試所以分別宗室覺羅等力學之勤惰及該學總管之賢否豈容屢次展限直至三十

年之久伊等平日不以爲事可知從前奏請展限之將軍及總管等交部查議著朝銓雅德會同永瑋舍圖肯考試

冬十月禁江南等省販運奉天米石

清實錄十月辛酉諭軍機大臣等昨戶部議駁莊有恭咨請奉省海運來江販賣糧徵收稅銀等因一摺止論江海關之稅額有無而不計及奉天米石之不應遠販江省未得此事窾要已諭令改議矣奉省糧價向來平減固由於地脈肥厚亦因不通商販搬運者少向遇直隸山東米糧稍短之年特許酌量販運以資調劑至近年暫開海禁亦因該處年穀豐盈聽其於直隸等近省轉糶流通商民均受其益至江南產米素多何須仰給奉天糧石卽該省果有歉乏必需海運接濟臨時自當籌畫辦

理亦不應聽其常川搬運且其地距奉天遙遠往來經涉重洋私販透漏諸弊皆所不免況商人輩趨利如鶩若漫無節制則奉省糧價必致漸昂並將來偶遇內地歉收之時撥運亦不可得矣著傳諭舍圖肯嗣後豐收之年除直隸山東商船准其照舊運載外其江省商販概行查禁不得稍滋影射倘有私自偷運者地方官嚴行察究奏明從重治罪至現在奉省商販已經到江米石自應查明徵稅俾該商等無重利可圖庶可杜絕將來販運可一併傳諭莊有恭知之

十一月減錦州義州馬兵改爲步甲禁蒙古錫伯巴爾虎佐領下女與漢人結親

清實錄十一月丙子軍機大臣等議覆錦州副都統常在奏稱

錦州義州馬兵請十分內一分改爲步甲蒙古錫伯巴爾虎漢軍包衣佐領下之女照滿洲例禁止與漢人結親查錦州義州額設馬兵一千九百四十七名生齒日繁生計不無拮据今通融酌改勻出數百分錢糧多養數百戶亦可多得當差之人應如所請至漢軍每與漢人結親歷年已久毋庸禁止其另戶蒙古錫伯巴爾虎佐領下女俱照滿洲例從之

定兼管奉天府府尹例以盛京工部侍郎雅德兼管奉天府尹

清實錄十一月戊寅諭向來奉天府府尹事務令盛京將軍兼轄今思將軍與府尹所屬旗民事件各有專司若令將軍節制於公務未免牽掣莫若照京城侍郎兼管順天府尹之例於盛京五部侍郎內派出一員管理永著爲令於體制更爲畫一現

在奉天府府尹事務卽著雅德兼管

耆獻類徵十一百八 雅德傳八月擢盛京工部侍郎兼管奉天府

府尹事

奉天通志卷三十三

奉天通志卷三十四

大事三十四 清

清八 高宗三

高宗乾隆三十一年春三月諭盛京丈出餘地酌撥徵租備冬圍兵丁需用

清實錄三月癸酉諭戶部議覆侍郎英廉奏請丈出盛京旗民餘地准令無地兵丁閒散人等認買一摺原爲旗人生計起見但此等無地人戶貧富不齊其有餘者置產必多而無力之家未必能一律承買恐於伊等資計仍無實濟因念該處冬圍兵丁一切鞍馬之需不無拮据若將此項餘地內酌撥徵租每年賞備資裝於該兵等殊有裨益其應撥用若干及所餘地畝除

撥補隨缺各項外或可一體徵租存貯動撥或聽旗人認買毋致有名無實之處新柱現在出差盛京著會同該將軍府尹等確勘該地實在情形妥協定議具奏尋奏丈出餘地約共三十一萬二千四百晌有奇其撥補官兵隨缺各項地應就本境撥給再有餘者卽令原種之旗民照數納租承種按地畝肥瘠糧額等差分別覈計每年共徵租銀十一萬二千四百兩有奇查每年派撥冬圍兵丁一千三百名每名擬賣銀十五兩卽於此項租銀內按數撥給餘銀解交盛京戶部另貯候撥如此一轉移間不特冬圍兵丁鞍馬有資無稍拮据而官員兵丁俱可得地耕種下部議行

復盛京宗學副管長員額

清實錄三月甲戌奉天府府丞李綬奏盛京宗學額立學生二十名副管長二員滿漢弓箭教習各二員嗣因學生僅有七名各奏裁一員今讀書宗室現有十九名滿漢弓箭教習各一員儘數訓導惟副管長有稽查教習約束學生之責一員不敷請照原額得旨如所請行

定本科會試中額奉天一名

此等凡見何故

清實錄三月己亥禮部以會試中額請得旨這會試滿洲蒙古取中三名漢軍取中一名奉天取中一名

夏四月振盛京災

清實錄四月乙巳賑盛京被水官莊戶口並蠲額賦

又四月己酉戶部議准盛京戶部侍郎富德奏乾隆三十年各

奉天通志 卷三十四
驛地畝被水成災照例分別加賑其水衝沙壓地畝應納米豆
草束分別蠲免並速勘確實畝數照數開除撥補從之

又四月丙寅戶部議奏盛京開原等並三陵內務府所屬地方
被水成災五分至十分不等應照成災分數分別賑蠲從之

秋七月暫停直隸山東兩省販運奉天糧石旋復弛禁

清實錄七月丁亥諭軍機大臣等據舍圖肯奏奉天各屬自五
月以來頗覺亢旱今七月初四等日雖得透雨秋收可望而市
集糧價日漸增長皆因商販囤積搬運所致等語向因奉天糧
石充裕是以直隸山東毗連省分許其就近販運以資接濟今
直隸山東現俱豐收民食自屬有餘無須更資奉天糧石應用
所有該二省現在運買商販著暫行停止並將此傳諭該將軍

府尹及督撫等知之

又九月丁丑諭向來奉天糧石充裕准令直隸山東毗連省分就近販運本年夏間經將軍舍圖肯奏該處雨水稀少或恐市集昂貴曾諭令該督撫將商販暫行停止今奉天續經普得雨澤仍可一律豐收將來糧食自必充足且現在東省歲收稍歉直隸又因鄰省運販糧價亦未免稍增商人等如有願往奉省糴運者尙於事理無礙設該處米價或昂往來販買必無餘利勢將不禁自止若竟概行示禁恐不肖官吏轉得藉端紛擾且射利商人保無私行偷販更易滋弊至少米處所民食稍有不敷方且加恩販濟廣爲籌畫若得該商等自爲販運流通俾資接濟於閭閻食用尤爲有益所有直隸山東二省商民販買奉

天米石之處仍著無庸禁止

冬十月設瀋陽書院

清實錄是月盛京將軍舍圖肯等奏軍機大臣等議覆奉天府府丞李綬奏請設瀋陽書院一摺令臣等會議查瀋陽書院始於乾隆七年前任府尹霍備勸捐修建向緣經費無項未經辦理今就卽舊有書院延師慎選生徒勤加訓誨實於文風有裨至奉天州縣每學設立學田一千畝每年可得租銀七百餘兩此項租田原以養贍貧士令其力學應卽以此作束修膏火之費餘銀仍酌給貧士其一切應行事宜責成治中總理府丞專司考察從之

十二月盛京戶部侍郎瓦爾達條奏三事

清實錄十二月癸亥軍機大臣等議覆盛京戶部侍郎瓦爾達條奏一大安常平新倉三處俱有守兵惟內倉無人看守應請添設一奉省王公莊頭往往以盜典主地在部自首及詢問時俱稱係伊已故之祖父伯叔經手之事恃無應坐罪之人希冀白徹地畝請嗣後遇此等事令伊等回明該王公卽於宗人府具呈查明咨行臣部辦理一各部京員多係賃房居住當差甚爲拮据請動項於空地造官房二百六十間每間每月一錢五公收租歸還原款如自願置房者聽均應如所請從之

三十二年春二月命盛京丈出餘地照舊例徵銀

清實錄二月乙卯軍機大臣等議覆盛京將軍舍圖肯等議奏據盛京兵部侍郎富德奏稱盛京現丈出旗民餘地三十一萬

奉天通志 卷三十四
四
餘响每年租銀十一萬二千四百餘兩請令銀米兼收俟各城
倉貯足用仍照例全收租銀查各屬地方遼闊道路紆長運腳
難免飛灑且每銀一兩折交米一石較市價過賤旗民勢難輸
納應請仍照舊例徵銀惟各城倉貯本屬無多應於秋收價平
時令各屬就近採買價昂卽行停止俟倉米足數遇青黃不接
之時卽如所奏以三成減價出糶秋成後照數買補還倉均應
如所議從之

又是月盛京工部侍郎兼管奉天府府尹雅德奏現丈出餘地
應徵租銀前往議准銀錢兼收解盛京戶部存貯所收錢除撥
給冬圍兵恩賞餘俱按成搭放春秋兵餉惟查每年租銀十一
萬二千有奇大半交納錢文按數起解勢必另籌運價且祇盛

京一城搭放各城未能流通恐奸商居奇抬價有妨旗民日用請將徵收租錢存貯各該州縣庫惟將實收數報明移咨盛京戶部酌覈各城應發兵餉並派撥冬圍兵應領恩賞銀兩按各該城徵錢多寡盡數配給所徵銀仍按限解交盛京戶部兌收得旨所奏甚是如所議行

兼管奉天府尹雅德條奏賑卹事宜

清實錄二月癸亥戶部議覆盛京工部侍郎兼管奉天府府尹雅德條奏賑卹事宜一承德鐵嶺開原廣寧四縣乾隆三十一年旱災水災飢民前借給一月口糧請作爲初賑仍按被災分數分別極次貧照例加賑一奉天倉儲接年賑撫支放均屬缺少撥運維艱除以借作賑米石仍用本色外其加賑米請以銀

米兼半給發每米一石折給銀六錢所需銀卽於各屬徵存地
丁項下動撥一辦納丁徭之戶及無地無丁土著併鰥寡孤獨
應如就被災屯堡分數分別極次貧一體銀米兼賑一承德開
原二縣倉米不敷支放請於附近之遼陽海城蓋平廣寧錦州
等處存倉米內酌撥三萬石分貯二縣其腳價每石每百里給
銀一釐二毫由奉天府理事通判庫貯項下動支一承德等四
縣災地錢糧請照例分別蠲免其蠲贖銀及本年民借糧石併
舊欠帶徵銀均予緩徵一奉天所屬丁銀向係另款徵收請將
承德等四縣按被災分數照蠲贖錢糧例緩至次年分年帶徵
又復州一處收成亦屬歉薄其丁銀應予一體緩徵一承德等
州縣學田無多被災各貧生應飭教官開送地方官由山海關

撥解耗羨餘贖項下酌量賑給一出旗入民戶口仍在興京鳳凰城一帶居住者甚多所種地畝被災均係旗員勘報而戶口例應民員點查應令旗員將被災分數移知民員分別大小口一體給賑其應予蠲緩事宜仍歸旗員照例辦理均應如所請從之

三月賑盛京等十三驛饑

清實錄三月乙丑賑卹奉天盛京驛舊邊甸驪河白旗堡二道井十三山廣寧小黑山開原法庫巖千戶屯噶布喇村薩爾濟等十三驛乾隆三十一年水災旱災飢民併蠲應徵額賦緩徵蠲贖銀米有差

夏五月以巴里瑪特襲科爾沁達爾漢爵

清實錄五月乙酉以故科爾沁達爾漢烏爾納蘇圖子巴里瑪
特襲爵

秋七月舍圖肯免以新柱爲盛京將軍

清實錄七月己丑諭據期成額奏管理葭局之佐領王睿開設
鋪面影射漁利驍騎校舒汝安幫同辦事情弊顯然請革職審
擬並請將葭局協領明德鄂山一併解任質審其將軍舍圖肯
聲名亦甚平常應俟審明後再行參奏等語王睿舒汝安著革
職明德鄂山著解任交與期成額等審明定擬具奏舍圖肯亦
著解任候訊其將軍事務著福僧額暫行署理以正紅旗蒙古
都統新柱爲盛京將軍

又閏七月癸巳諭軍機大臣等期成額等查辦幫貼葭票銀兩

一案究出佐領王睿韓朝鳳等開設德聚德錦店鋪壟斷圖利並恃韓朝鳳爲將軍親信之人倚藉聲勢朋比爲奸舍圖肯曾知王睿等聲名不好仍令在局盤踞多年其中自有別情等語舍圖肯身爲將軍何竟容管理棧局各員通同舞弊若此深堪駭異舍圖肯韓朝鳳俱著革職

耆獻類徵

二百八十七

新柱傳三十二年署理熱河副都統尋授盛

京將軍

修望祭長白山神殿

清實錄七月辛卯工部議覆盛京工部侍郎兼管奉天府府尹雅德疏稱望祭長白山神殿柱木黝爛牆院倒塌柵欄柱木亦俱朽損業經委員勘估懇請動項興修應如所請從之

冬十月建盛京將軍公廨

清實錄十月甲子諭據新柱奏稱盛京將軍衙署內向無私宅住所往往租房居住今漢軍八旗官學年久傾圮請將各旗現有官房令其兩旗設立一學餘房於盛京銀庫內借銀六百兩建立將軍公廨所借銀於將軍應得養廉內十年扣繳均著照所請行

三十三年春正月新柱卒以明福爲盛京將軍

清實錄正月丙午諭據瓦爾達等奏稱盛京將軍新柱於正月十四日病故等語新柱內廷行走年久今聞溘逝朕心深爲軫惻著加恩賞銀一千兩辦理喪事應得卹典該部察例具奏調福州將軍明福爲盛京將軍

耆獻類徵

十二百八十七

新柱傳三十三年卒賜祭葬諡勤肅

二月定盛京試用人員調缺題署例

清實錄二月辛酉吏部議准奉天府府尹耀海奏稱查定例試用人員應俟調補所遺之缺方准署理奉天州縣僅十二缺非各省缺多易於揀調者可比每遇調缺出時無合例之員必須歸部揀補以致試用人員得缺無期請嗣後奉天州縣調缺出時如現任內實無合例之員准於試用人員內擇其明白諳練者揀選題署從之

以喇什納木扎勒襲科爾沁扎薩克土謝圖親王爵

清實錄二月辛巳以故科爾沁扎薩克土謝圖親王納旺弟喇

什納木扎勒襲爵

定盛京將軍衙門堂主事揀選各驛站監督等差例

清實錄二月癸未吏部等部議准原任盛京將軍新柱奏稱盛京五部主事遇各驛站監督等差俱可揀選差竣保舉議敘惟將軍衙門堂主事一缺只許挨俸陞轉查堂主事係總辦事務之員較五部主事倍加勤苦而各差不與揀選似未平允請嗣後凡有驛站監督內倉正副監督及中江稅差將軍衙門堂主事准其一體開列揀選其驛站監督年滿議敘之處亦准照例保題從之

遣回朝鮮漂泊漁戶

清實錄二月丙戌盛京禮部侍郎溫敏奏高麗龍川居民董芳春金官一金文愛駕船捕魚遇風漂至鳳凰城小島子地方當

卽行文該國王查覆屬實現在資給衣服口糧遣回下部知之
夏四月撥盛京旗地租銀充兵丁紅白賞項

清實錄四月戊辰軍機大臣等議覆奉天將軍明福奏稱奉天
地方於乾隆二十五年起留銀三十五萬兩作本生息現在既
經停止自應以次收徹但其中如布錢估衣雜貨糧石等間及
當舖皆易清結請以一年爲限惟官兵旗民鋪戶人等借欠之
項多寡貧富不齊一時難以歸結請限年歸款等語查所定限
期三年至五年均屬太寬請交與該將軍等再行察覈妥議又
稱生息銀旣停其兵丁紅白賞項請於旗地租銀內動撥查旗
民餘地每年共徵銀十一萬兩有零除常用外每年尙餘銀七
萬餘兩應如所奏卽於此項內動撥又稱廣寧縣修理橋道向

有生息之項應請一例撤除等語但該處橋道工程經費作何辦理亦請交與該將軍等悉心籌酌得旨依議速行

許奉天存留戰船

清實錄四月乙亥軍機大臣等議奏據奉天將軍明福奏覆前奉諭議裁戰船查奉天現在止存趕繪船六隻每年操演須四隻駕駛二隻鎮守又歷年以三隻防海三隻巡海不能裁汰等語查奉天瀕臨大洋非船身稍大難以涉歷風濤所有戰船六隻應如所請照舊存留從之

冬十一月定大挑二等舉人派赴奉天差委例

清實錄十一月壬寅吏部議覆奉天府府丞李綬奏稱奉天一省並無挑選二等舉人而奉天教職較別省尤要應如所奏嗣

後令直隸總督於報明二等舉人內酌派二員赴奉天聽候差委從之

十二月定盛京五部侍郎輪班主祭例

清實錄十二月丙辰諭據宗人府奏盛京主祭之宗室章京阿郎阿果勒明阿病故請由在京宗室章京內揀派二員前往等語盛京祀典所關甚鉅如宗室章京不敷卽著令五部侍郎輪班主祭無庸由京遣往

添設盛京宗室總族長佐領等員

清實錄十二月癸亥軍機大臣等議覆宗人府奏盛京宗室向無管轄之人請照京師例添設總族長一員每翼添設宗室佐領一員俟出缺時令盛京將軍於盛京承祭宗室中每缺各擬

一員由宗人府帶領引見補用並鑄給總族長關防佐領圖記
三年無過給紀錄一次領催人等卽在該處充派均應如所請
從之

召明福入京以額爾德蒙額署理盛京將軍

清實錄十二月丁卯諭曰盛京將軍明福有面問事件著馳驛
來京所遺印務暫令額爾德蒙額署理

振承德等四縣災

清實錄十二月甲戌戶部議准盛京部工侍郎兼奉天府府尹
雅德疏稱承德遼陽海城廣寧等四州縣本年被水請先撫卹
一月口糧仍分別加賑其新舊錢糧及餘地額租等項均按年
緩徵得旨依議速行

三十四年春正月明福免以恆祿爲盛京將軍

清實錄正月辛卯諭曰明福現有應行查訊事件著解任交與刑部看守

又正月乙未調吉林將軍恆祿爲盛京將軍

又五月乙酉諭軍機大臣會同刑部審訊明福等豫提關稅彌補虧缺請將明福革職依例擬斬監候一案關稅年徵年解自屬一定之例明福任意那後補前其罪固由自取但覈其弊混情節總由一味糊塗且那補仍歸官項與蠹公肥橐者有間明福著革職從寬免其治罪並將前後提補之數免其通行合算祇將三十二年分那補稅銀二萬四千餘兩令該旗於明福名下追賠至常在接管關務僅五十餘日因仍前轍其罪較輕已

降旨將伊降補用示懲儆所有那補稅銀亦著免其通算其實
在應賠銀五千餘兩仍著照例追出入官以昭平允

調盛京錫伯兵征勦緬匪

清實錄正月辛丑諭軍機大臣等征勦緬匪東三省兵甚屬得
用著再傳諭盛京將軍於新滿洲錫伯兵內揀派年力精壯者
一千名酌量兵數於城守尉協領內擇其善於彈壓者陸續帶
領來京其應得之項俱照從前所派一體賞給

二月耀海遷以博卿額爲奉天府尹

清實錄二月辛未以奉天府府尹耀海爲盛京禮部侍郎乙亥
以侍講學士博卿額爲奉天府府尹

三月定本科會試中額奉天一名

此節至此凡十見想是一科一之

清實錄三月壬子禮部以會試中額請得旨這會試滿洲蒙古取中三名漢軍取中一名奉天取中一名

夏四月命盛京旗員不必補綠營官著爲例

清實錄四月己卯諭昨延綏鎮總兵華山來京陛見伊係烏拉齊人不稱外任東三省人多精壯能著軍功若留京錄用既可得力而伊等亦有陞階若用爲綠營官員伊等不識漢字豈能辦理營務是以將華山留京補授副都統嗣後東三省人等俱不必補用綠營官永著爲例並著兵部將現在各省綠營官內共有東三省人若干詳查具奏

東華錄四月己卯諭嗣後東三省人不必補綠營官著爲例

冬十月命盛京旗員在京已歷兩代者仍准補綠營官

清實錄十月庚戌諭前以東三省人員不識漢字難以辦理綠營事務諭令兵部查奏遇綠營員缺停其補放至伊等子孫生長在京者原與舊滿洲無異自應分別揀用此次撤回人員著引見後候旨並交八旗都統等查明在京已經兩代者嗣後仍准其選補綠營但不可因有此旨於騎射清語皆不學習致染漢人習氣

三十五年春二月免海城縣額賦

清實錄二月甲寅豁除奉天海城縣水衝沙壓地四百五十二畝有奇餘地十九晌五畝有奇額賦

三十六年春三月定本科會試中額奉天一名

清實錄三月丁卯禮部以會試中額請得旨這會試滿洲蒙古

取中三名漢軍取中一名奉天取中一名

夏四月賜二甲王爾烈進士出身

清實錄四月乙未上御太和殿傳臚賜二甲王爾烈等五十五人進士出身

瀋故三說者謂盛京自開國以來未有中鼎甲者惟乾隆中遼陽王爾烈以傳臚顯不知文僖公麻勒吉固開國時滿榜狀元也

五月裁盛京十五邊門筆帖式

清實錄五月丙辰吏部議覆盛京將軍恆祿等奏稱威遠堡等十六邊門除鳳凰城關口其餘筆帖式十五員並無承辦之事請裁應如所請再盛京候補筆帖式試請照京城筆帖式之例三

年考試一次並現在議汰之筆帖式及庫使外郎等一體與考查外郎一項係六年報滿應行考職其以筆帖式補用之員以年滿之遲早爲得缺之先後若考試等第與報滿先後名次不符礙難辦理除庫使准三年分別等第外如外郎與考惟繙譯荒謬者卽行革退其未至荒謬者仍令供職從之

秋九月裁鳳凰城照料朝鮮使臣官員

清實錄九月戊午盛京將軍恆祿副都統額爾德蒙額禮部侍郎志信等奏鳳凰城向設照料朝鮮使臣之主客官迎送官二項自康熙年間設駐城守尉凡朝鮮使臣出入俱交城守尉派防禦一員專司其事今年六月經兵部議請將迎送官二員請裁臣等查主客官事同一例亦應請裁遇朝鮮使臣過境一併

交城守尉委防禦專辦得旨允行

釐定奉天學額

清實錄九月乙丑禮部議准奉天府府丞吳綬奏稱學制員額與應試人數宜隨時裒益持平復州學額八名額多人少蓋平廣寧二縣每學二名額少人多請將復州照遼陽寧遠二州之例定爲五名所餘三名撥增蓋平廣寧各一名仍餘一名歸入奉天府學從之

會典事例

九一零三

三十六年議准奉天復州學額自雍正十三年

爲始照小學例取進八名蓋平廣寧二縣學各取進一名今復州應試僅三十餘人蓋平廣寧二縣應試自三十餘人至五十餘人不等各學額數未昭平允應將復州原額八名照遼陽寧

遠二縣之例改爲五名以復州所減三員增撥蓋平廣寧各一名仍餘一名歸入奉天府學令該府丞於府屬州縣內撥取武童亦照此例辦理

三十七年春正月免奉天錦州二府額徵米豆

清實錄正月辛丑諭本年輪蠲奉天等省地丁銀兩其米豆一項例不在應蠲之內但念奉天省地丁錢糧向來銀糧並徵其額徵米豆卽屬任土正供自當普予加恩俾得共樂殷寧益兆倉箱之慶著將奉錦二府乾隆三十七年應徵米豆一體蠲免以廣惠澤該部卽遵諭行

東華錄正月辛丑免奉天錦州二府額徵米豆

以盛京將軍恆祿爲內大臣

清實錄正月庚戌以盛京將軍恆祿爲內大臣

三月移熊岳理事通判駐岫巖裁錦縣教諭改設岫巖巡檢

清實錄三月辛亥吏部等部議覆盛京工部侍郎兼管奉天府府尹雅德奏奉天屬岫岩城幅員遼闊旗民雜處該城向未設民員歸城守尉專管分隸遼陽海城蓋平復州寧海等五州縣兼管相距各二三四百里不等稽察難周熊岳理事通判現無應辦事請移駐岫岩界內命盜戶婚等案悉歸該通判分別旗民照例辦理應徵地丁錢糧餘地租銀亦歸催徵鑄給岫岩理事通判關防至倉庫錢糧通判公出需員看守且監獄尤藉專員查錦州府縣二學共額進生員十六名請將錦縣學生員歸併府學教授兼管該學教諭裁改設岫岩巡檢管理監獄緝

捕鑄給岫岩巡檢印再奉天州縣民地錢糧俱銀米各半徵收
岫岩距兼轄州縣遠納米維艱雍正八年題定全徵折色今
既歸通判就近徵收亦應銀米如常以歸畫一從之

會典事例

九一三零

三十七年設岫岩通判一人兼理鳳凰城

雅德遷以瓦爾達調補盛京工部侍郎兼管奉天府府尹

清實錄三月庚申諭曰刑部侍郎員缺著雅德署理瓦爾達著

調補盛京工部侍郎並兼管奉天府府尹

由倉場侍郎調

耆獻類徵

十一百八

雅德傳三十七年調刑部侍郎

定本科會試中額奉天一名

清實錄三月甲子禮部以會試中額請得旨這會試滿洲蒙古
取中三名漢軍取中一名奉天取中一名

夏四月瓦爾達遷以朝銓兼管奉天府府尹以景福爲盛京工部侍郎

清實錄四月甲戌以盛京工部侍郎瓦爾達爲東陵總管內務府大臣丁丑以盛京刑部侍郎朝銓兼管奉天府府尹事務

東華錄四月丁丑以景福爲盛京工部侍郎

由左副都御史遷

六月恆祿卒以增海爲盛京將軍

清實錄六月辛巳諭曰將軍恆祿宣力有年茲聞溘逝深爲軫惻著加恩賞銀五百兩辦理喪事仍交該衙門照鎮國公例辦理又諭曰增海著調補盛京將軍所遺黑龍江將軍員缺著傅玉調補

又七月丙辰予故盛京將軍奉恩輔國公恆祿祭葬如例諡恭

愨

冬十二月頒太學樂舞器具圖於奉天製造

清實錄十二月辛酉朔禮部議准奉天府府丞吳綬詔奏稱奉天府文廟丁祭時猶沿用民間鼓樂請頒發太學樂舞器具圖依式製造並由奉天府選衍生數人咨送太常寺肄習俾得轉相傳授以備聲容從之

裁減盛京馬甲添設步甲

清實錄十二月丙戌諭曰將軍增海等具奏盛京各佐領下所有馬甲多寡不等請裁馬甲添設步甲其餘贖錢糧並隨缺地畝入於正項報銷一摺經軍機大臣會同該部覈准具奏所辦非是盛京額設馬甲並隨缺地畝皆爲養贍該處滿洲而設今

年久生齒日繁若將伊等應得分例裁汰入官於伊等生計殊屬無益如現在京中八旗戶口繁盛生計不無拮据經朕特沛恩施另賞鰥寡孤獨錢糧以資生理其派往西安涼州莊浪寧夏兵丁俱照所派之額在京挑補又添兵缺甚多每年多費帑金不下數萬並無恡惜國家一切用度固應節儉然亦止宜酌減無益糜費並查覈不肖人員使不得從中侵蝕至於正項應支之處豈可節省盛京滿洲皆朕臣僕人丁日盛不敷養育尙宜酌量添給豈有轉將伊等現在應得分例裁汰之理今佐領下馬甲額缺不均固宜均勻辦理但此項裁缺錢糧地畝亦宜斟酌養贍多人或添設步甲或作爲養育兵俾衆人均霑實惠不宜如此辦理著將此項裁汰之馬甲三百十六名錢糧交增

海等或添設步甲或添設養育兵惟期普被恩施辦理具奏其
隨缺地三千一百六十晌如何使衆人均有裨益之處並著增
海等定議具奏將此通諭中外示朕體恤滿洲至意

又三十八年閏三月乙亥兵部議覆盛京將軍增海等奏稱裁
汰馬甲所餘錢糧應添步甲三百八十八名尙餘銀二千六百
一十六兩添設養育兵四百三十六缺於滿洲蒙古漢軍各佐
領下按鰥寡孤獨人數酌給以資養贍如應裁馬甲一缺卽挑
補步甲一名養育兵二名如挑步甲領催一名卽挑養育兵一
名俱按佐領次序勻挑至盛京滿洲漢軍內務府三旗官學生
共一百四十名向無公費請將養育兵內勻出之一百四十分
錢糧賞給以資學習俱應如所請行從之

三十八年春二月命朝銓留京以瓦爾達兼管奉天府府尹

清實錄二月壬戌諭本日召見朝銓見其精神委頓現在病尙未愈著留京調治俟病痊之日另行補用其奉天府府尹事務著瓦爾達兼管

定贖回盛京民典旗地辦法

清實錄二月乙丑欽差尙書裘曰修等奏查盛京民典旗地計十二萬餘晌蒙恩動帑回贖請嗣後原業旗人自能耕種准其撤回原佃民人欠租官爲催比如抗玩不交徹地另行招佃至帑項未經扣完以前旗人不能自種佃戶又無拖欠遽將地畝撤回者治罪示儆得旨所奏是依議

閏三月增海有疾以額爾德蒙額署盛京將軍

清實錄閏三月乙亥諭據增海奏久患舌腫至今言語不清請將將軍印務交額爾德蒙額署理回京調治等語增海患病當早奏請醫何得至今始行具奏增海不必來京著派御醫張鼎令伊子二等侍衛德清阿三等侍衛德襄阿帶同馳驛前往醫治其將軍印務卽照所請令額爾德蒙額暫行署理

夏四月添設奉天刑部滿司獄一員

清實錄四月壬寅吏部議覆盛京刑部侍郎喀爾崇義奏稱盛京刑部羈禁人犯約有一百二三十名至四五十名不等原設漢司獄一員如遇疾病事故防範難周請添員管理應如所請添設滿司獄一員協理監務定爲滿缺該侍郎於本部滿洲筆帖式內慎選送部帶領引見補授仍食筆帖式俸管理五年仍

回原任任內無過出具考語咨部註冊俟盛京各衙門應陞之主事缺出歸單月陞選從之

五月增海卒以弘晌爲盛京將軍

清實錄五月乙亥諭據額爾德蒙額等奏稱將軍增海病故等語盛京將軍員缺甚屬緊要必得能事之員方有裨益弘晌自授福州將軍以來於一切事件俱能留心妥協盛京將軍員缺卽著弘晌調補

又七月庚申予故盛京將軍加贈太子太保增海祭葬如例諡勤果

耆獻類徵二百八十九弘晌傳三十八年六月調盛京將軍

秋八月瓦爾達革以德風爲盛京戶部侍郎兼管奉天府府尹

清實錄八月庚寅諭前據博卿額奏錦縣知縣圖勒炳阿審辦
薛士詔毆死伊兄一案瓦爾達有袒庇情弊瓦爾達著革職

東華錄八月癸巳瓦爾達緣事革職以德風爲盛京戶部侍郎

由內閣
學士遷

清實錄八月壬寅以盛京戶部侍郎德風兼管奉天府府尹

三十九年春三月開採遼陽鷓子峪復州五虎嘴煤窰

清實錄三月丁巳盛京將軍兼內務府大臣宗室弘晌奏奉天
遼陽境內惟恃白西虎山煤窰分給但開挖年久未能似前豐
裕而開原廣寧牛莊等城運用絡繹價長數倍復州等城距窰
數百里運致維艱查白西虎山迤南之鷓子峪復州所屬之五
虎嘴均屬產煤地方並無關礙陵寢風水應請招募旗人自行

出資開採由臣會同府尹各給印照一紙造具夫役姓名冊報
地方官查覈照例徵收稅銀作為正項得旨可行知道了

耆獻類徵

二百八十九

弘晌傳三十九年三月奏言白西虎山煤窰

空年久未能豐裕請於迤南之鷄子峪復州所屬之五虎嘴招
募旗人開採照例徵稅

夏四月定盛京宗室考補三陵等員缺並簡盛京五部侍郎一員
同管宗學例

清實錄四月癸未朔宗人府議覆盛京將軍弘晌奏稱盛京宗
室覺羅在宗學肄業者向例五年分別等次有願來京就侍衛
筆帖式者同在京肄業宗室補用總管副管由閒散宗室補放
如教訓有方遇盛京看守三陵員缺請旨以應陞之缺補用查

奉天通志 卷三十四
宗室覺羅等在盛京居住多年京中有產業者甚少若令補用侍衛筆帖式必移家京師往往有肄業中止者總管副管等因看守三陵旗員中無對品應陞之缺補用無期嗣後請將總管副管缺由肄業宗室考取繙譯一二等擇年壯者補放情願就侍衛筆帖式者仍令進京至盛京看守三陵有公中防禦之缺請令副總管同應陞之驍騎校挑選現在二總管前因管理宗室覺羅佐領不得其人奏准將二總管放爲虛職佐領遇有失察等事處分伊等並無陞進之路亦於勸懲之道未協請遇看守三陵翼長缺出令伊等同該旗章京挑選再肄業宗室覺羅首重清語繙譯滿教習由部院選送者皆不能精通管理宗學府丞亦祇通漢文均於宗室覺羅未能有益嗣後請於盛京五

部侍郎內簡派一員與府丞一體管理宗學均應如所請從之
銷化盛京舊有鎗礮

清實錄四月己丑盛京將軍弘晌副都統額爾德蒙額奏盛京
舊有銅鐵大小礮七十九鳥鎗一千三百三十八礮子六千八
百分貯臣等衙門其中因潮溼銹朽者礮三十九礮子一千八
百鳥鎗俱不堪用查盛京工程需用銅鐵俱動正項採買請將
此項銹朽鎗礮等銷化備用得旨嘉獎

耆獻類徵

二百八十九

弘晌傳又奏盛京工程需用銅鐵俱動正項

採買見查存貯槍礮及礮子有因潮溼銹污不堪用者請將此
項銷化備用以省工費均得旨允行

五月命科爾沁達爾罕親王旺濟勒多爾濟會辦索約勒濟圍場

清實錄五月丙辰黑龍江將軍傅玉奏索約勒濟圍場歷年俱
係黑龍江將軍會同達爾漢親王查勘辦理具奏今達爾漢親
王色旺諾爾布遺缺伊子旺濟勒多爾濟既已承襲應否同臣
辦理圍場事務請旨遵行得旨旺濟勒多爾濟著一同辦理

廣寧城屬蝗

清實錄五月戊寅諭軍機大臣等據弘昫奏現在廣寧城屬坡
台子大黑山等處所有蝗蝻俱由口外飛入恐口外尚有蝻孽
一面咨行直隸總督及喀喇沁貝子一體搜捕等語所辦甚是
冬十一月命高樸查辦岫巖旗倉糧價減少案

清實錄十一月丙辰諭戶部奏駿盛京岫岩城旗倉糧價減少
一摺若僅交該侍郎將軍府尹等查辦難免彼此迴護仍不能

得其底裏著派侍郎高樸馳驛前往會同盛京戶部及該將軍等徹底根查據實覆奏

又十二月癸未諭軍機大臣等據侍郎高樸會同將軍弘晌審訊岫岩城旗倉出糶減價過多一案審出兵丁等扶同商議希圖便宜呈請多減等語盛京所屬各城官米減價出糶係朕特恩矜恤旗僕至意理宜遵照糶買乃兵丁等因該城守尉甫經接任卽扶同商議呈請多減價值情甚可惡伊等均係滿洲世僕又係盛京本地之人不守淳樸舊習任情商議挾制上官勒令減價殊干法紀此風斷不可長高樸等僅以懲責完結殊屬輕縱著傳諭弘晌等務將起意與衆商議共係幾人查出從重定擬具奏此案率請減糶之城守尉富健著交部嚴加議處其

奉天通志 卷三十四
盛京戶部堂司各官並著交部分別察議

四十年春三月禁盛京滿州人改稱漢姓

清實錄三月乙丑諭本日引見之正黃旗滿洲驍騎校塔清阿奏稱高家氏多隆額奏稱楊家氏俱係漢姓伊二人係屬盛京義州包衣佐領盛京乃根本之地似此沾染漢習滿洲舊姓將來必至泯沒卽如瓜勒佳氏呼爲關家氏富察氏呼爲傅家氏大關滿洲風俗著傳諭弘昫妥爲留心辦理

定本科會試中額奉天一名

清實錄三月壬申禮部以會試中額請得旨這會試滿洲蒙古取中三名漢軍取中一名奉天取中一名

夏四月命查禁奉天邪教

清實錄四月庚寅諭據德風等奏海城縣訪獲旗人劉得智等
私立混元紅陽會邪教又錦縣承德縣及牛莊巡檢訪獲一炷
香如意會及天主等教拿獲案犯送交盛京刑部審擬等語所
辦甚好邪教煽惑愚民最爲世道人心之害不可不嚴切根查
況盛京根本重地風素淳樸尤不宜聽其蔓延滋事該侍郎府
尹等當徹底研求逐一嚴究務絕根株至劉得智身係旗人不
知守法膽敢私立邪教更非事理所應有情節甚爲可惡著傳
諭喀爾崇義將該犯審明從重究治不得僅照民人倡教之例
問擬

五月命盛京滿洲學習清語

清實錄五月丙寅諭今日吏部帶領引見之盛京兵部送到指

缺補放戶部筆帖式果爾敏除履歷外詢以清語全然不能果爾敏係考取筆帖式又係盛京本地之人清語自當熟練乃至全然不能實出意外盛京乃滿洲根本之地風氣日下至於此極尙可問乎況盛京設立官學原有教習果爾敏又係考取繙譯之人伊等平素如何教訓考取時又如何取中著傳詢伯興將果爾敏係如何考送之處令其明白回奏盛京將軍亦係專司教養之人如果以此爲事嚴行所屬何至如此此事所關甚大並著傳諭弘昫嗣後務須加意訓飭令滿洲等學習清語以復滿洲本業若仍任其如此日就廢弛斷不姑貸

秋七月博卿額病免以明通爲奉天府尹

清實錄七月丁巳以太僕寺少卿明通爲奉天府府尹

八月命義州知州燕都改名克昇額

清實錄八月庚辰諭曰義州知州燕都身係滿洲其音寫漢字名竟似燕姓漢人在京住久故名燕都以取文義聯絡此等陋習實爲可鄙滿洲成語可以取名者甚多其音漢字樣不致牽混者亦復不少何必用燕都二字以與漢人姓名相混乎著傳諭德風諭令該知州卽另行改名附便奏聞並咨部旗存案尋奏該知州遵卽改名克昇額得旨覽

命阿思哈往盛京查辦事件

清實錄八月壬辰諭著派阿思哈馳驛前往盛京查辦事務

又諭據弘晌奏稱承德縣知縣福綱任意勒索商鋪銀兩等語著交弘晌喀爾崇義將福綱革職拿問在盛京刑部監禁嚴防

奉天通志 卷三十四
俟阿思哈到時審訊

又九月壬子諭軍機大臣等據阿思哈奏查審參革承德縣知縣福綱勒借鋪戶銀兩一案緣福綱在京補授承德縣時卽託素識之候補吏目李康寧說合立票借寇姓李姓郭姓等八扣銀三千五百餘兩福綱到任後六月初間李姓郭姓持票至承德縣索取福綱無銀償還遂向鋪戶勒借清還等語福綱甫爲縣令卽揭借多金以致勒索部民財物其罪實無可追除交阿思哈審明定罪外所有福綱在旗家產著英廉會同該旗一併查抄毋使隱匿寄頓至李康寧寇姓李姓郭姓等膽敢在京重利放債並直至承德署肆意逼索情實可惡著英廉卽將李康寧寇姓李姓郭姓等一併拿交刑部審明按律究擬以示懲創

將此諭令知之

冬十月德風免以富察善兼管奉天府府尹

清實錄九月壬子諭曰福綱已另有旨交英廉查辦矣至德風以侍郎兼管府尹於所屬知縣勒借部民銀兩漫無覺察有應得之咎著阿思哈於審明定案時將德風一併參劾照例定擬具奏

又十月丙子調倉場侍郎富察善爲盛京工部侍郎

代德風

耆獻類徵

七十八

富察善傳四十年十月調盛京工部侍郎兼奉

天府府尹

購書貯瀋陽書院

清實錄十月丙戌奉天府府丞李綬奏奉天瀋陽書院向來頒

有書籍坊肆亦少藏書請將書院充公盈餘銀五百兩購買士子應讀各書存貯書院以資生徒講貫得旨嘉獎

定巡察盛京由都察院五年奏派一次例

清實錄十月庚寅諭向例派員巡盛京黑龍江吉林三處由都察院衙門奏派科道其歸化城游牧二處由吏部向各衙門查取通曉蒙古言語人員請旨派往同一奏派巡察而或由都察院或由吏部辦理殊未畫一嗣後此五處差務總歸都察院衙門奏派其應需通習蒙古言語之員卽著都察院行文咨取再三年請派巡察之例尙覺太近嗣後著於五年奏派一次不必再行請旨著爲令此次盛京等處巡察著於丁酉年

按卽十二年
隆

奏派

十一月命盛京將軍等繪進輿圖

清實錄十一月壬午諭朕恭閱舊滿洲檔冊太祖太宗初創鴻基闢取輿圖甚廣卽如葉赫烏喇哈達輝發那木都魯綏芬尼瑪察錫伯瓜勒察等處皆在舊滿洲檔冊之內雖在東三省所屬地方因向無繪圖竟難按地指名歷爲考驗邇來平定準噶爾回疆等處時朕特派大臣官員將所有地方俱已繪圖昭垂永久列祖初開鴻業式廓疆圉豈可轉無繪圖著恭查滿洲檔冊詳對盛京志實錄繕寫清單扎寄盛京吉林黑龍江將軍等各將省城爲主某地距省城幾許見今仍係舊名或有更改並有無名山大川古人遺蹟逐一詳查三省會同共繪一圖呈覽定奉天山東沿海州縣官員失察流民私渡例

清實錄十一月丙戌吏部議覆盛京將軍弘晌奏稱請將失察流民私行渡海之奉天山東沿海州縣及巡查各員嚴行議處嗣後如有失察流民私行渡海別經發覺者照台灣流寓民人眷屬偷渡例將沿海州縣及巡查文職官失察一名至十名者罰俸一年十名以上降一級留任二十名以上降一級調用至武職巡哨洋面均有稽查之責如有失察亦照此例搜其偷渡名數分別議處其守口武弁遇有疏縱卽照盤查不實例降二級調用從之

東華錄十一月丙戌定奉天山東沿海州縣文武員弁失察流民私行渡海例

毀千山雙峰寺函可和尚碑塔

耆獻類徵

八七十

富察善傳十一月先是上檢閱各省呈繳應毀

書籍內有千山和尚詩本語多狂悖諭曰千山僧函可廣東博羅人因獲罪發遣瀋陽刻有詩集恐無識之徒目爲緇流高品並恐瀋陽地方或奉以爲開山祖席於世道人心甚有關係著宏晌富察善確查函可在瀋陽時曾否占住寺廟有無支派流傳承襲香火及有無碑刻字蹟查明據實覆奏旋奏盛京通志內載千山和尚來至瀋陽之千山雙峰寺建有小塔當卽馳赴查明並無承襲支派惟雙峰寺查有函可碑塔並語錄詩句其支派僧人法貞等實皆愚蠢均屬務農山僧查函可係獲罪發遣之犯膽敢放蕩詩詞肆意狂悖請將雙峰寺所遺碑塔盡行拆毀及盛京通志內所載事蹟逐一刪除報聞

十二月定奉天民員旗員會同編查保甲例

清實錄十二月乙巳諭據議覆盛京侍郎兼管府尹富察善奏請更易保甲一摺已降旨依議行矣奉省旗人與民人錯處原無界址之分自應給與門牌編入保甲以防奸匪潛蹤所有該處旗員並應會同地方官一體稽查彈壓富察善所奏自屬正辦乃德風從前竟未籌辦及此是必因與弘晌不合竟將應辦公事有意膜視實屬任私誤公甚爲錯謬德風著傳旨嚴行申飭

又軍機大臣議准盛京侍郎兼管府尹富察善奉天府尹銘通奏稱奉天各州縣及旗莊地方旗民錯處並無旗界民界之分是以歷來俱係旗民官員會同查辦一體給予門牌若以旗人

毋庸編查恐旗民所雇流寓傭工潛匿奸匪雖有旗員查察究不若編入保甲旗民官員一體會查之周密至奉省州縣及通判等官所轄地方遼闊管界旗員較多如會同查辦實足以資民員所不及若止令民員辦理遇有重犯旗員前往查拿民人以保甲非旗員應辦或致抗違兼恐旗員以無編查民人保甲之責不肯實心究察請將奉天保甲仍照向例令旗民官員會同編查應如所請從之

四十一年春二月舉行乾隆四十年奉天大計

清實錄二月庚申舉行乾隆四十年大計奉天省年老官一員才能不及官一員處分如例

夏四月裁寧遠州中後所州判改設巡檢

清實錄四月己酉吏部等部議准盛京工部侍郎兼管奉天府
府尹富察善疏稱寧遠州中後所地方向設巡檢一員後改設
州判管理人命詞訟等事但究係佐雜旗民視非正印不甘聽
斷請裁歸寧遠州知州自行經理唯中所後係關外要地應仍
設巡檢專司巡緝定爲調缺從之

諭盛京不得稱省

清實錄四月丙寅諭軍機大臣等本日據弘昫等奏覆摺內稱
拜發奏摺卽於是日起程回省立言殊未允當奉天陪都重地
歷來稱爲盛京非各省可比弘昫等諒所知悉摺內自應稱回
盛京方爲得體雖俗語有東三省之說統言之尙屬無礙乃竟
稱京爲省則斷乎不可卽如順天府尹近在京城遇有奏摺亦

只可稱爲京師或稱爲京城豈能因係府尹所在亦稱京城爲省乎弘晌等何不知檢點如此俱著傳旨申飭

五月盛京將軍弘晌請將兵丁隨缺地畝官爲徵收按價折米不許

清實錄五月戊寅諭軍機大臣等本日戶部議駁弘晌等奏盛京各城兵丁隨缺地畝請交地方官按則徵租將所得租銀折中定價改給米石一摺所駁甚是已依議行矣各城兵丁賞給隨缺地畝俾其自爲耕種以資養贍所以體恤兵丁者至爲周渥弘晌等乃因其地有遠近輒欲官爲徵收按價折米設或豐歉不齊採買無資又將作何籌辦該將軍等何未計及於此至從前定議時原令將現在閑空荒甸就近均勻分撥何以兵丁

等受撥之田悉皆寫遠是當時已屬辦理不善卽或因地畝不能就近分撥有斷難照辦之勢當時卽應據實奏明另爲設法妥辦乃近年相沿已久忽欲一旦更張又不計其事之是否可行是徒欲邀譽衆兵而未知通盤籌劃有是理乎著傳諭弘晌等卽將因何如此改辦緣由明白回奏仍照部議將其中有無弊混之處據實奏覆此旨著由四百里傳諭知之

六月命重繪盛京地圖分註開國事蹟

清實錄六月丁巳諭盛京吉林等處乃我祖宗肇迹興王之所前因皇輿全圖刊載地名不能賅備命於實錄內恭查詳列清單將原圖並交將軍弘晌等查明添補嗣據弘晌等按其道里形勢將所開地名添繪成圖呈覽已交輿圖處將舊圖增改刊

刻但舊圖方幅有限詳載地名字體已小不能復列事蹟於關
岐之締造尙不足以示昭垂緬維列祖天作基祥鴻業經營規
模大備如我太祖太宗大破明師於薩爾濟山及凡戰勝攻取
之地開勦艱難皆有山川疆域可考自宜節舉大要分註圖中
俾我世世子孫按圖瞻仰並得曉然於景命所貽前勞所啟一
切欽承敬畏以鞏億萬載不丕基詒謀垂裕之道無有大於此
者著將盛京等處地方另行展拓繪爲大圖一幅溯自長白發
祥至奄有遼瀋建國遷都暨神武戡定各事蹟並爲標目兼清
漢字分註圖中俾皆瞭如指掌以備觀省而示久遠卽交大學
士舒赫德協辦大學士尙書公阿桂尙書英廉督率所司敬謹
辦理其如何覈計里數展圖若干足敷標識之處著令西洋人

悉心測算並卽飭工繪樣呈進俟閱定卽壽諸棗梨用昭世德
鴻圖之盛懷遵毋忽

又七月丁亥諭軍機大臣等據舒赫德等奏將盛京等處地名
另行展繪全圖呈題紀載並將各事蹟兼清漢字依次附載圖
後用備稽考繪圖呈樣自應如此辦理此圖繪成刊刻時應將
朕前日所降諭旨列於圖首以昭久遠至皇輿原圖盛京僅有
兩排正須將新查地名添入原圖標舊標識地名無庸紀載事
蹟將此傳諭知之

東華錄六月丁巳命重繪盛京等處地圖分注開國事蹟

秋七月命奉天各州縣仍兼用滿漢人員

清實錄七月己亥諭向來奉天所屬州縣原係滿漢人員兼用

嗣因府尹蘇昌等於辦理流民案內稱奉天府各州縣凡詞訟等事關涉旗民者俱會同旗員審理往往意見參差致難完結若將旗員銓選較爲畫一等語經軍機大臣議覆降旨允行今思奉天地方旗人居住者多旗員在彼不無沾涉親故遇有審理事件恐不免心存偏徇卽有拘謹之人聽斷時過避嫌疑亦不得謂之公當且恐緣事被劾之員接任仍係旗員或遇應查事件不無瞻顧情面輾轉滋弊地方公務必致積久廢弛殊非整飭吏治之道嗣後奉天各州縣缺出著照各省仍以滿洲漢人通用惟是奉天地方兼管旗民較爲繁劇初任之員恐難辦理裕如所有各州縣缺出應交該部於候補人員內揀選引見候朕簡員補用其作何酌量兼用滿漢人員之處著該部詳悉

奉天通志 卷三十四
定議具奏

又八月甲寅吏部議奏嗣後奉天州縣缺出除應調之缺仍令該府尹於現任屬員內揀選陞調外其應歸部揀補缺出遵旨卽於候補州縣人員內揀選惟漢員應補州縣人數尙多滿員州縣丁憂回旗百日孝滿仍在原衙門行走按班以主事小京官筆帖式補用並無仍補外任之例今旣滿漢並用應請卽於此項人員內揀選引見再記名同知及截取州縣之筆帖式二項雖未歷外任俱係在部院行走經該堂官保送與進士舉人未經筮仕者不同嗣後丁憂回旗人員不敷揀用請卽於記名同知知縣之筆帖式內揀選引見如該員到任後或以不能勝任題參仍將原保之堂官議處從之

原书缺页

原书缺页

原书缺页

原书缺页

戕害於是我太祖赫然震怒以七大恨告天興師報復自薩爾
濟松山杏山諸戰大敗明兵明人欲與我求和斥而不許彼尙
安能輕侮我朝乎且漢高乃秦之亭長唐祖乃隋之列公宋爲
周之近臣明爲元之百姓或攘或侵不復顧惜名義若我朝乃
明與國當闖賊擾亂明社旣移之後吳三桂迎迓王師入關爲
之報讐殺賊然後我世祖章皇帝定鼎燕京統一寰宇是得天
下之堂堂正正孰有如我朝者乎至若我國家誕膺天眷朱果
發祥亦如商之元鳥降生周之高禔履武紀以爲受命之符要
之仍係大金部族且天女所浴之布勒湖里池卽在長白山原
不外白山黑水之境也又金世紀稱唐時靺鞨有渤海王傳十
餘世有文字禮樂是金之先卽有字矣而本朝國書則自太祖

時命額爾德尼巴克什等遵製通行或金初之字其後因式微散佚遂爾失傳至我朝復爲創造未可知也他如建州之沿革滿洲之始基與夫古今地名同異並當詳加稽考勒爲一書垂示天下萬世著派大學士阿桂于敏中侍郎和坤董誥悉心檢覈分條編輯以次呈覽候朕親加釐定用昭傳信而闢羣惑並將此通諭知之尋阿桂等奏編輯事宜酌擬凡例呈覽並請欽定嘉名得旨知道了書名著定爲滿洲源流考

定盛京斬絞案犯招供揭送大理寺例

清實錄八月壬午諭曰江蘭奏各省遇有人命重案俱將全案招供揭送大理寺察覈惟盛京一處向無隨本揭帖請嗣後遇有斬絞各案亦照各省之例將招供一體揭送大理寺等語著

照所請嗣後盛京遇有斬絞重案其招供揭帖並著一體送大理寺以憑查覈

封閉復州五虎嘴元臺子等處煤窰

清實錄八月戊午封閉復州屬五虎嘴元台子等處煤窰從盛京將軍宗室弘晌請也

冬十月修盛京神杆石座

清實錄十月乙卯諭軍機大臣等據弘晌奏盛京神杆石座漸至朽壞神杆年雖久遠不可輕易石座中安放神杆處雖少有朽壞或接或補將杆斗裂處略爲修理完全石座雖舊亦無關係惟宜將破損處修補無庸改作著傳諭德保與弘晌會同查勘若杆斗石座尙屬可用卽無庸修補若朽壞過甚卽遵旨敬

春天通志 卷三十四 三十五
謹修理毋得輕易改作此時德保若已起程至二三站接到此旨卽回盛京會同弘昫辦理

十一月命查勘廣寧一帶新開鷓鷹二河

清實錄十一月庚辰諭從前盛京將軍達勒當阿等奏奉天所屬廣寧等處向係低窪其水多自邊外流入而新開鷓鷹等河又無河身以致漫溢四出大路田畝均有積水若挑一大河引水入海則村莊道路旗民熟田均免淹浸且可開墾蕩田等語朕派高斌會同達勒當阿勘估具奏經軍機大臣覈議准於三年後興工後因將軍阿蘭泰奏新開等河河身較隄決處所微小高卽另挑河身仍不能暢流徒費帑項又經軍機大臣議停興工惟令該將軍每年修補橋道毋致行人壅滯今據英廉口奏

新開鷓鷹等河若照從前查辦另濬一河於彼處村莊旗民實有裨益且可開墾蕩田數萬餘頃等語廣寧等處停止挑河修補橋道以來已二十餘年近年新開鷓鷹等河河流情形若何若另挑河身能否安流順軌順流後可墾蕩田若干畝從前修補橋道是否有益現在仍舊修理與否均著傳諭弘晌親往詳勘據實定議具奏

又四十三年正月己巳軍機大臣等議覆盛京將軍宗室弘晌奏稱廣寧一帶新開鷓鷹二河上年十一月奉旨查勘恐下流漫溢酌籌挑濬並查可開蕩田若干橋路曾否歲修今查該二河無下流之患新開已歷四年鷓鷹已歷七年應毋庸挑濬附近蕩田除已開墾升科外仍可開蕩田三十八萬二千餘晌惟

地非甚腴如有呈墾者應請三年後升科五年後丈量至該處
橋路從前恃有生息一項每年修補嗣因此項歸入查收案內
橋路停修歷無水患惟四十一年被巨流河漲衝現據商販捐
修等語均應如所奏其新開鷓鷹二河或遇雨水過大漲衝橋
路應飭該將軍等隨時妥辦從之

十二月命移閑散宗室分往杏山松山地方居住

清實錄十二月己酉軍機大臣等議奏據盛京將軍弘晌奏稱
大凌河馬廠西北杏山松山地方丈得澤田萬畝有奇地甚肥
美請移閑散宗室分往居住查閑散宗室內願往者一百十五
戶大小共二百零三名其十歲以上及隨孀婦之單戶閑散宗
室共一百三十四名餘俱未及十歲係隨父兄度日不必給予

房間地畝等項其應得者每名給銀二百八十兩暫給八十兩
治裝起程俟到該處時再給二百兩每人給地三頃一半官爲
開墾一半著自行從容開墾或令家人耕種或募民人耕種其
地畝不許私行典賣如查出私行典賣者將價銀地畝並追入
官典賣人照違禁例治罪如有病故乏嗣者將家產呈報將軍
分給人口衆多之宗室成丁者再每戶給房八間如子弟衆多
不敷居住者著該將軍酌量多予數間其房屋編爲四屯各就
地畝近處修築查在京宗室十歲者每月給銀二兩二十歲三
兩每歲給米四十八斛今遣伊等前往不必支給米石仍按歲
照京城宗室例減半給與銀兩俟十年後居久服習全行裁汰
又每人給與耕種器械到該處先給一年口糧應飭該將軍將

奉天通志 卷三十四
應墾地畝卽豫行派兵耕種收貯糧石以備給予其紅白事應得銀兩俱照盛京舊居宗室例辦理再墾地蓋房豫交該將軍辦理俟來年秋季分作二起遣往請飭宗人府於京城現任奉恩將軍內揀選四員護送到該處卽分住四屯令其嚴行管束又由現住宗室內擇老成者每屯揀選二名賞戴金頂協同辦事奉恩將軍係現任官員其應得之俸照舊給予外每員給地五頃房十二間銀三百兩仍給予耕種器具所管宗室內有妄行滋事或私將房地典賣等事將該管官一併治罪盛京舊居之宗室等或有生齒日繁不能度日者併飭該將軍酌給地畝錢糧一體辦理從之

耆獻類徵

二百八十九

弘晌傳四十三年三月奏大凌河馬廠西北

丈得澤田一萬畝有奇請移駐閑散宗室

命盛京等處查拿朝鮮逆黨

清實錄十二月辛酉諭朝鮮國王奏該國有逆臣洪麟漢等結黨謀逆一案罪人業經伏法恐其支黨實繁或有逃匿漏網者懇勅關口官員查獲等因一摺該國臣服多年素稱恭順今該國王既恐有餘黨潛逸之事自應代爲查詰不容竄入內地著諭盛京將軍弘晌山東巡撫國泰於盛京山東地方與朝鮮接界邊隘海口嚴飭所屬留心察詰如有語言形蹤可疑查係朝鮮人民卽行盤獲奏聞發交該國自行究治該將軍巡撫務當實力妥辦毋得視爲具文

四十三年春二月封閉寧遠縣茨兒堡煤窰

清實錄二月己酉工部議准盛京將軍宗室弘晌疏稱寧遠所屬茨兒堡原採煤窰創挖無效請嚴行封閉從之

三月暫停移駐閑散宗室

清實錄三月壬戌軍機大臣等議覆盛京將軍宗室弘晌奏稱前因盛京丈得閒田議請移駐閑散宗室一百餘戶分爲四屯給屋一千八間地四百四十三頃每屯駐宗室章京一員閑散三十戶建屋木料由遼陽寧遠等處運買甃瓦缺少戶給瓦屋三間餘蓋平棚墾田一犁三牛兵爲耕種一切需費先由盛京戶部支領又每屯設貼寫傳事馬甲各四名並另給蕩田一頃取租作爲公用此外餘地招墾俱應如所請得旨此事暫行停止辦理著存記

命修開原等縣倉廩

清實錄三月庚辰諭軍機大臣等據索興阿奏開原縣倉現貯米穀豆五萬九千餘石盤查大數雖屬無虧但該縣倉廩共一百四間內三十六間全行倒塌其餘牆壁亦多歪斜木植黦朽所貯米石率多色變黴爛詢據該縣稱歷任詳請重修經府尹委勘駁查以致辦理遲緩請勅該府尹等趕緊修建其黴爛米石卽著落富察善等分賠等語所奏甚是已於摺內批示矣開原縣倉廩旣多倒塌自應據詳題請趕緊修葺乃因委勘駁查之故延擱累年以致米多黴爛富察善銘通實不能辭其咎所有此項米石卽行查明數目著落富察善名下賠完仍將辦理延緩緣由據實明白回奏至該縣存貯米穀豆石全數實有若

干是否俱係額徵向來作何支用滿貯廩座若干據奏每廩貯穀八九百石至千餘石不等合計五萬餘石之糧不過數十間已敷存貯何至一百餘間之多與其空廩不用一任倒塌何如按照存糧實數酌留數十間趕緊歸併修葺俾歸實濟且省物料開原一縣如此其餘各州縣是否亦有似此者著傳諭富察善銘通卽行逐細查明覈實存糧數目應留倉廩間數酌量上緊修葺以節糜費而歸實用

定本科會試中額奉天一名

清實錄三月丁亥禮部以會試中額請得旨這會試滿洲蒙古取中三名漢軍取中一名奉天取中一名

夏四月命奉天採運麥石至京師

原书缺页

原书缺页

語著傳諭周元理卽派妥幹之員前往接收運到麥石

命移實錄尊藏崇謨閣

清實錄四月辛丑諭軍機大臣等前曾恭送五朝實錄並玉牒至盛京尊藏向於正殿後建有敬典崇謨二閣原爲留都金匱石室之儲頃詢之德保知實錄尊藏鳳凰閣玉牒則在敬典閣陳貯而崇謨閣現在空閒與建閣命名之意殊未相稱著傳諭弘昫將崇謨閣上悉心相度如制尙寬廣可容書廚排列卽迎五朝實錄至彼尊藏方爲允協或同藏或分代恭貯皆可至玉牒每十年一次修葺告成卽應續送將來積久愈多或敬典閣不敷存貯卽於鳳凰閣均勻收藏亦無不可再敬典崇謨二閣及頤和迪光等殿係乾隆幾年創建盛京自有檔冊可稽並著

弘晌卽行查明一併覆奏將此由四百里諭令知之

五月停止盛京宗室覺羅教習

清實錄五月辛未軍機大臣等議奏盛京宗室覺羅向立官學原爲肄習漢文而設但宗室覺羅子弟自當以熟練弓馬及學習繙譯爲先務至欲兼習漢文則該處之舉貢生員等自爲師承留心講貫亦無難於通曉應請將盛京額設宗室覺羅教習之例停止報聞

會典事例九二零四十二年盛京宗室覺羅官學漢教習四員裁

汰

鑄盛京戶部管莊圖記

清實錄五月壬午鑄給盛京戶部管莊六品官圖記從侍郎喀

爾崇議請也

秋七月增鐵嶺等九路兵額

清實錄七月丙辰諭前據將軍弘晌奏請將義州等三處兵額酌裁三百六十名分添鐵嶺九路經兵部議裁一半已准行矣今思鐵嶺等處煩衝孔道差務較多該兵等更番差遣休息無時於耕種生計究屬無益所有義州等處額兵無庸裁汰著加恩添兵缺一百八十名分給鐵嶺等九路於餘丁內挑充

八月命修盛京各處城垣

清實錄八月乙丑諭盛京爲本朝王迹肇基之地朕恭謁祖陵道出山海關經過各處城垣多有坍塌殊不足以壯觀瞻而資捍衛著軍機大臣會同將軍弘晌查明何處最爲緊要應行修

奉天通志 卷三十四 四十一
築妥議具奏候朕發帑興工併派員稽查督辦

又八月己巳諭昨因盛京各處城垣多有坍塌令軍機大臣會同將軍弘晌將應行修築事宜詳查妥議具奏今據議稱各屬城垣必應修築共有十八處分爲三次修葺並請簡派大員稽查督辦等語已依議行矣此項工程著派邁拉遜德成督辦伊等接奉諭旨卽馳驛前往行在候朕面降諭旨卽可會同將軍府尹赴各屬勘估以便發帑興工所有工部尙書事務著金簡暫行署理

又十二月丁丑軍機大臣等議奏邁拉遜德成辦理岫岩熊岳復州三處城垣意見不同臣等遵旨詢問查得岫岩地方卑窪舊城基趾較高應卽就該處加修將衙署倉庫移建城內復州

土性鬆浮若城垣根腳外用磚修內填灰土不能堅固應將拆
下石料挪砌俱用石土至熊岳城南逼近沙河應於臨河堅築
泊岸再於上游添設挑水壩俟興工時度地辦理問之邁拉遜
德成等均無異說請仍交伊等酌辦從之

會典事例

九一
三零

四十三年遵旨議定重修奉天各屬遼陽州海

城縣蓋平縣開原縣鐵嶺縣復州寧海縣撫順城岫岩城鳳凰
城熊岳城並錦州府所屬錦縣寧遠州廣寧縣義州中後所城
中前所城巨流河城共十八處

命建遼河神廟

清實錄八月辛未諭遼河雙源遙引合而爲巨流河襟帶神臯
恬波涵潤實爲陪都境內大川朕恭謁祖陵蹕路所經舟梁利

涉緬維河神之功甚溥顧該處向無祠祀典尙闕焉著邁拉遜德成會同將軍府尹於勘估城工之便在瀕河高阜處所度地計工奏聞請帑專建河神廟以昭妥侑

東華錄八月辛未諭邁拉遜德成會同將軍府尹於勘估城工之便在瀕河高阜處所度地計工請帑專建河神廟

會典事例

九一零

四十三年建遼河神廟

帝謁永陵至興京

清實錄七月丁未上啟鑾詣盛京謁陵諭朕此次前往盛京恭謁祖陵所有經過直隸奉天州縣地方著加恩蠲免本年應徵地丁錢糧十分之三該部卽遵諭行乙卯駐蹕文殊庵丙辰駐蹕中前所丁巳駐蹕周家村西八月戊午朔駐蹕沙河所東翼

日如之庚申駐蹕五里河村辛酉駐蹕杏山東壬戌駐蹕興隆
屯癸亥駐蹕金剛屯甲子駐蹕廣寧城南翼日如之丙寅駐蹕
常家屯丁卯駐蹕蔣家店戊辰駐蹕黃旗堡己巳駐蹕佛柵子
庚午駐蹕大臺辛未駐蹕噶布該壬申駐蹕蓮花套癸酉駐蹕
尙家河西甲戌上謁永陵是日駐蹕夏園翼日如之乙亥行大
饗禮詣顯佑宮行禮閱興京城

帝謁福昭二陵至盛京

清實錄八月丙子駐蹕尙家河西丁丑駐蹕蓮花套戊寅駐蹕
噶布該西己卯上謁福陵蠲免奉天所屬府州縣乾隆四十四
年地丁正項錢糧是日駐蹕馬關橋庚辰行大饗禮是日駐蹕
瓦子峪辛巳上謁昭陵行大饗禮遣官祭長白山遼河渾河松

奉天通志 卷三十四
四十四
花江諸神是日駐蹕盛京舊宮至丁亥皆如之

廣奉天各屬科試學額

清實錄八月辛巳諭盛京爲本朝根本重地兵丁皆知恪守舊風嫻騎射以裕武備現亦校閱分別賞賚其讀書之士亦漸摩文化蒸蒸日盛堪與畿甸比隆朕鑾輅所臨青衿獻詩趨迓絃誦彬彬具見膠庠樂育自宜一體加恩用彰作人盛典著將盛京滿合二號及奉天所屬各學科考廣額一次其向取進六名以上者增額三名四五名者增額二名二三名者增額一名該府丞其悉心校錄甄拔殊尤副朕嘉惠士林至意

命重修盛京天壇地壇並移建太廟

清實錄八月丙戌命重修盛京天壇地壇移建太廟於大清門

東

九月命建渾河神廟

清實錄九月丁亥朔諭渾河發源遙遠自東北來入英莪邊門西流幾及千里會遼入海縈護三陵滋演萬年靈脈長川襟帶兼衛陪都厥功甚鉅自宜虔崇廟祀以答神庥著交邁拉遜德成會同將軍府尹於盛京城東度地鳩工奏聞請帑興建河神廟以昭妥侑

會典事例

九一零

四十三年建渾河神廟

帝自盛京回鑾

清實錄九月戊子上自盛京啟鑾回京師是日駐蹕佛柵子己丑駐蹕黃旗堡庚寅駐蹕蔣家店辛卯駐蹕常家屯壬辰駐蹕

奉天通志 卷三十四 四十五
網戶屯癸巳駐蹕金剛屯甲午駐蹕興隆屯乙未駐蹕杏山東
丙申駐蹕五里河村丁酉駐蹕沙河所東戊戌駐蹕周家村西
己亥駐蹕中前所庚子駐蹕文殊庵壬子上還宮

冬十月富察善病免以全魁兼管奉天府府尹

清實錄十月乙酉諭據銘通奏盛京工部侍郎兼管奉天府府
尹富察善染患痰疾驟難痊愈等語所有奉天府府尹事務著
盛京禮部侍郎全魁暫行兼管

耆獻類徵

七十

富察善傳四十三年十月因病解任

十一月免奉天省糧賦

東華錄十一月戊戌免奉天省本年及明年額徵米豆

喀爾崇義免調全魁爲盛京戶部侍郎以玉鼎柱爲盛京禮部侍

郎

東華錄十一月庚子調全魁為盛京戶部侍郎以玉鼎柱為盛

京禮部侍郎

由內閣
學士遷

弘晌罷以福康安為盛京將軍

清實錄十一月癸丑錦州協領富伸保等科斂船戶銀兩一案

弘晌應解任質審所遺盛京將軍著福康安調補

自吉林將
軍調補

又十二月癸酉諭曰弘晌身為將軍於錦州科派之事漫無覺
察實屬糊塗辦理不善咎亦難辭弘晌著加恩以散秩大臣効
力贖罪不必在御前侍衛上行走

耆獻類徵

二百八十九

弘晌傳十二月錦州協領福神保藉差科派

經錦州副都統德福劾奏命兵部尚書福隆安馳赴查辦先將

奉天通志 卷三十四
弘晌革任查明有無染指授意情事尋奏弘晌因錦州蓋州牛莊三處協領缺分較好令其量爲幫貼存貯所設差局酌撥公用實未授意斂錢亦並不入己但以宗室大臣見小滋弊請交宗人府會同刑部治罪福神保等發往烏魯木齊效力贖罪諭曰弘晌如果與所屬通同作弊藉差斂錢入己卽當從重懲治今訊明實無染指亦未授意斂派不至革職治罪但身爲將軍於辦理差務令屬員幫費而於錦州科派之事又漫無覺察實屬糊塗弘晌著加恩以散秩大臣效力贖罪

四十四年春二月舉行乾隆四十三年奉天大計

清實錄二月甲戌舉行乾隆四十三年大計奉天罷軟官一員年老官一員有疾官一員分別處分如例

三月命毀改奉天所屬碑墓等違礙字樣

清實錄三月乙巳諭上年諭令李綬將奉天各屬所有神祠墳墓碑碣及村堡隘口門扁等項詳細查明如有違礙字樣卽行磨毀改刻嗣據該府丞陸續奏明應行磨毀改刻者共一百六十六件報聞

秋七月許盛京旗人往吉林種地謀生

清實錄七月甲辰諭盛京吉林均係國家根本之地境壤毘連盛京旗人潛往吉林種地謀生本無關礙並非逃旗可比從前弘昫奏請解回治罪之處所辦原屬過當伊等皆滿洲世僕盛京吉林有何區別其正身旗人六戶卽著入於吉林當差無庸解回盛京辦理

遼西盤城縣

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

遼西盤城縣，其地與遼東人共，其地與遼東人共，其地與遼東人共。

奉天通志卷三十四